

植物名實圖考

植物名實圖考長編卷之六

固始吳其濬著

蒙自陸應穀校刊

山草

人參

黃耆

甘草

赤箭

天麻

朮

沙參

遠志

萎蕤

巴戟天

目錄

山草卷之六

本草綱目卷之
肉蓯蓉

升麻

丹參

徐長卿

防風

獨活

細辛

柴胡

黃連

胡黃連

防葵

黃芩

白薇

桔梗

白鮮

知母

貝母

元參

紫草

紫參

秦艽

王孫

淫羊藿

狗脊

地榆

苦參

龍膽

茅根

附茅彙考

黃茅

白芨

白頭翁

貫衆

黃精

薺苳

白前

前胡

本草綱目卷之六
木部
杜蘅

及已

鬼督郵

延胡索

仙茅

通脫木

山慈菘

人參

本草經人參味甘微寒主補五臟安精神定魂魄止驚悸除邪氣明目開心益智久服輕身延年一名人銜一名鬼蓋

別錄微溫無毒療腸胃中冷心腹鼓痛胸脇逆滿霍亂吐逆調中止消渴通血脈破堅積令人不忘一名神草一名人微一名土精一名血參如人形者有神生上黨山谷及遼東二月四月八月上旬採根竹刀刮暴乾無令見風陶隱居云上黨郡在冀州西南今魏國所獻卽是形長而黃狀如防風多潤實而甘俗用不入服乃重百濟者形細而堅白氣味薄於上黨次用高麗

高麗卽是遼東形大而虛軟不及百濟百濟今臣屬高麗高麗所獻兼有兩種止應擇取之爾實用並不及上黨者其爲藥切要亦與甘草同功而易蛀艸唯內器密封頭可經年不壞人參讚曰三椹五葉背陽向陰欲來求我椹樹相尋椹樹葉似桐甚大蔭廣則多生陰地採作甚有法今近山亦有但作之不好

圖經人參生上黨山谷及遼東今河東諸州及泰山皆有之又
有河北權塲及閩中來者名新羅人參然俱不及上黨者佳其
根形狀如防風而潤實春生苗多於深山中背陰處近椹漆下
濕潤處初生小者三四寸許一椹五葉四五年後生兩椹五葉

未有花莖至十年後生三椹年深者生四椹五葉中心生一莖俗名百尺杵三月四月有花細小如粟蕊如絲紫白色秋後結子或七八枚如大豆生青熟紅自落根如人形者神二月四月八月上旬採根竹刀削去土暴乾無令見風泰山出者葉幹青根白殊別江淮出一種土人參葉如匙而小與桔梗相似苗長一二尺葉相對生生五七節根亦如桔梗而柔味極甘美秋生紫花又帶青色春秋採根不入藥本處人或用之相傳欲試上黨人參者當使二人同走一與人參含之一不與度走三五里許其不含人參者必大喘含者氣息自如者其人參乃真也李絳

兵部手集方療反胃嘔吐無常粥飯入口卽吐困弱無力垂死者以上黨人參二大兩拍破水一大升煮取四合熱頓服日再兼以人參汁煮粥與噉李直方司勳除郎中於漢南患反胃兩月餘諸方不差遂與此方當時便定差後十餘日發入京絳每與名醫持論此藥難可爲儔也又雜他藥而其效最著者張仲景治胸痺心中痞堅留氣結胸膈滿脇下逆氣搶心治中湯主之人參朮乾薑甘草各三兩四味以水八升煮取三升每服一升日三如臍上築者爲腎氣動去朮加桂四兩吐多者去朮加生薑三兩下多者復其朮悸者加茯苓二兩渴者加朮至四兩

半腹痛者加人參至四兩半寒者加乾薑至四兩半滿者去朮
加附子一枚服藥後如食頃飲熱粥一升許微自溫勿發揭衣
被此方晉末以後至唐名醫治心腹病者無不用之或作湯或
蜜丸或加減皆奇效胡洽治霍亂謂之溫中湯陶隱居云霍亂
餘藥乃或難求而治中丸四順厚朴諸湯不可暫闕常須預合
每至秋月常齋自隨唐石泉公王方慶云治中丸以下數方不
惟霍亂可醫至於諸病皆療並須預排比也其三方者治中湯
四順湯厚朴湯也四順湯用人參附子炮薑乾薑甘草各二兩
切以水六升煎取二升半分四服若下不止加龍骨二兩若痛

加當歸二兩厚朴湯見厚朴條

宣室志有趙生者性魯鈍雖讀書然不能分句詳義隱晉陽山
葺茅爲舍晝習夜思旬餘有翁衣褐來造謂生曰子居深山中
讀古人書卒不能分句詳義何蔽滯之甚耶生曰僕自度老且
無用故居深山讀書自悅雖不能達其精微然必欲終於志業
翁曰子志趣甚堅老夫雖無能誠有補於君幸一訪我耳因訪
其所止翁曰吾段氏子家於山西大木下言竟忽忘所見生怪
之遂徑往山西尋其跡果有椹樹蕃茂生日豈非段氏子乎因
持畱發其下得人參長尺餘甚肖所遇翁之形遂瀹而食之自

是醒然明悟

西溪叢話人參許氏說文人蓂字與參同扁鵲云有毒或生邯鄲二月生葉小花核黑莖有毛九月採根有頭足手面目如人春秋運斗樞云搖光星散爲人參廢江淮山瀆之利則搖光不萌人參不生禮斗威儀云君乘木而王有人參生廣雅云參地精人參也梁書阮孝緒母疾須人蓂舊傳鐘山所出有鹿引之鹿滅得此草異苑與廣五行記皆云土下有呼聲掘之得人參如人形四體備具聲遂絕

澠水燕談錄孫思邈千金方人參湯言須用流水煮用止水則

不驗人多疑流水無異予嘗見丞相荆公喜放生每日就市買活魚縱之江中莫不泮然唯鱮魚入江中輒死乃知鱮魚但可居止水則流水與止水果不同不可不知

爾雅翼春秋運斗樞曰搖光星散爲人參廢江淮山瀆之利則搖光不明人參不生禮斗威儀曰君乘木而王有人參生說文云人蓐出上黨蓐卽參也所以名爲人參者本草云如人形者有神范蠡計然亦曰狀類人者善說者曰出新羅國有手脚狀如人形長尺餘或云生鄆鄂者根有頭足手面目如人或曰生上黨者人形皆具能作兒啼說益侈則益誕大率生深山中近

椴漆下濕潤處椴似桐而多蔭故人參生其下高麗人作人參

讚曰三椴五葉背陽向陰欲來求我椴木相尋欲試上黨人參者當使二人同走一與人參含之度走三五里許其不含者必大喘含者氣息自如潛夫論曰治疾當得真人參反得蘿菔梁阮孝緒母疾須得生人參舊傳鍾山所出孝緒躬歷幽險見鹿前引就鹿滅處視之得此草傅子曰先王之制九州異賦天不生地不養君子不以爲禮若河內諸縣去北山絕遠而各調出御上黨真人參上者十斤下者五十斤所調非所生民以爲患其潞州太行山所出者謂之紫團參

本草綱目李時珍曰上黨今潞州也民以人參爲地方害不復
采取今所用者皆是遼參其高麗百濟新羅三國今皆屬於朝
鮮矣其參猶來中國互市亦可收子於十月下種如種菜法秋
冬采者堅實春夏采者虛軟非地產有虛實也遼參連皮者黃
潤色如防風去皮者堅白如粉僞者皆以沙參薺芫桔梗采根
造作亂之沙參體虛無心而味淡薺芫體虛無心桔梗體堅有
心而味苦人參體實有心而味甘微帶苦自有餘味俗名金井
玉欄也其似人形者謂之孩兒參尤多屬僞宋蘓頌圖經本草
所繪潞州者三椹五葉真人參也其潞州者乃沙參之苗葉沁

州兗州者皆薺芘之苗葉其所云江淮土人參者亦薺芘也並失之詳審今潞州者尙不可得則他處者尤不足信矣近又有薄夫以人參先浸取汁自啜乃曬乾復售謂之湯參全不任用不可不察考月池翁諱言聞字子郁銜太醫吏日嘗著人參傳上下卷甚詳不能備錄亦略節要語於下條云爾

隋書五行志高祖時上黨有人宅後每夜有人呼聲求之不得去宅一里所但見人參一本枝葉峻茂因掘去之其根五尺餘具體人形呼聲遂絕蓋草妖也視不明之咎時晉王陰有奪宗之計詔事親要以求聲譽譖皇太子高祖惑之人參不當言有

物憑之上黨黨與也親要之人乃黨晉王而譖太子高祖不悟聽邪言廢無辜用有罪因此而亂也

潞安府志人參原出壺關紫團山舊有參園今已墾而田矣而索者猶未已張翰林謂其遍剔巖藪根株鮮獲而人慕虛名寺膺實害每值易參僧以倍價市之逮繫彌旬吏緣爲奸又司捕者假以巡察橫索參錢山僧斂而納之至鬻衣鉢翰林名鐸卽其邑人

林縣志紫團山在縣西南五十里西抵上黨縣界山山產紫團參人呼爲截谷參蓋生必在山谷之口也

廣雅疏證葎地精人蓼也各本俱作地精人葎也御覽引廣雅作葎地精人蓼也蓋葎卽蓼字後人病其重複而刪改之耳案古人詁訓之體不嫌重複如崇高字或作嵩而爾雅云嵩崇高也篤厚字說文作竺而爾雅云篤竺厚也字林以蹉爲古嗟字而爾雅云蹉嗟也孫炎以適爲古述字而爾雅云適述也若斯之類皆所以廣異體也鹿腸元蓼也葎地精人蓼也苦心沙蓼也三蓼字正同一例不得獨改此條蓼字爲葎今據御覽訂正說文葎作葎云人葎藥草出上黨神農本草云人參味甘一名人銜一名鬼蓋生上黨山谷御覽引范子計然云人參出上黨

狀類人者善又引吳普本草云人參一名土精一名神草一名黃參一名血參一名人微一名王精或生邯鄲三月生葉小銳核黑莖有毛根有頭足手面目如人是人參以形得名土精猶地精也色黃故又名黃參陶注本草云上黨人參形長而黃狀如防風多潤實而甘百濟者形細而堅白高麗者形大而虛軟並不及上黨者人參生一莖直上四五相對生花紫色高麗人作讚曰三極五葉背陽向陰欲來求我椴樹相尋椴樹蔭廣則多生陰地也人參之名始著於緯書御覽引春秋運斗樞云搖光星散爲人參廢江淮山瀆之利則搖光不明人參不生又引

禮斗威儀云乘木而王有人參至則西漢時已貴重之潛夫論
思賢篇云治疾當真人參反得支羅服當麥門冬反得蒸穢麥
人參麥門冬皆本草上品也

直勿名實圖考
人參

山草卷之六

木
今
夕
十
三

黃耆

本草經黃耆味甘微溫主癰疽久敗瘡排膿止痛大風癩疾五痔鼠瘻補虛小兒百病一名戴糝

別錄無毒婦人子藏風邪氣逐五臟間惡血補丈夫虛損五勞羸瘦止渴腹痛洩痢益氣利陰氣生白水者冷補其莖葉療渴及筋攣癰腫疽瘡一名戴糝一名獨糝一名芟草一名蜀脂一


名百本生蜀郡山谷白水漢中二月十月採陰乾陶隱居云第一出隴西洮陽色黃白甜美今亦難得次用黑水宕昌者色白肌理粗新者亦甘溫補又有蠶陵白水者色理勝蜀中者而冷

補又有赤色者可作膏貼用消癰腫俗方多用道家不須
唐本草註云此物葉似羊齒或如蒺藜獨莖或作叢生今出原
州及華原者最良蜀漢不復採用之

圖經黃耆生蜀郡山谷白水漢中今河東陝西州郡多有之根
長二三尺已來獨莖或叢生枝幹去地二三寸其葉扶疎作羊
齒狀又如蒺藜苗七月中開黃紫花其實作莢子長寸許八月
中採根用其皮折之如綿謂之綿黃耆然有數種有白水耆有
赤水耆有木耆功用並同而力不及白水耆木耆短而理橫今
人多以苜蓿根假作黃耆折皮亦似綿頗能亂真但苜蓿根堅

而脆黃者至柔韌皮微黃褐色肉中白色此爲異耳唐許裔宗
初仕陳爲新蔡王外兵參軍時柳太后感風不能言脈沉而口
噤裔宗曰旣不能下藥宜湯氣熏之藥入腠理周時可差乃造
黃耆防風湯數斛置於牀下氣如烟霧其夕便得語藥力熏蒸
其效如此因附著之使善醫者知所取法焉

救荒本草黃耆今處處有之根長二三尺獨莖叢生枝幹其葉
扶疎作羊齒狀似槐葉微尖小又似蒺藜葉濶大而青白色開
黃紫花如槐花大結小尖角長寸許採嫩苗葉燂熟換水浸淘
洗去苦味油鹽調食



甘草

本草經甘草味甘平主五臟六腑寒熱邪氣堅筋骨長肌肉倍力金瘡腫解毒溫中久服輕身延年

爾雅藿大苦註今甘草也蔓延生葉似荷青黃莖赤有節節有枝相當或云藿似地黃

別錄國老無毒主溫中下氣煩滿短氣傷臟欬嗽止渴通經脈利血氣解百藥毒爲九土之精安和七十二種石一千二百種草一名蜜甘一名美草一名蜜草一名露草生河西川谷積沙山及上郡二月八月除日採根暴乾十日成陶隱居云河西上

郡不復通市今出蜀漢中悉從汶山諸夷中來赤皮斷理看之
堅實者是枹罕草最佳枹罕羌地名亦有火炙乾者理多虛疎
又有如鯉魚腸者被刀破不復好青州閒亦有不如又有紫甘
草細而實乏時可用此草最爲衆藥之主經方少不用者猶如
香中有沉香也國老卽帝師之稱雖非君而爲君所宗是以能
安和於草石而解諸毒也

圖經甘草生河西川谷積沙山及上郡今陝西河東州郡皆有
之春生青苗高一二尺葉如槐葉七月開紫花似柰冬結實作
角子如葦豆根長者三四尺麤細不定皮赤上有橫梁梁下皆

細根也二月八月除日採根暴乾十日成去蘆頭及赤皮今云
陰乾用今甘草有數種以堅實斷理者爲佳其輕虛縱理及細
韌者不堪惟貨湯家用之謹按爾雅云藟大苦釋曰藟一名大
苦郭璞云甘草也蔓延生葉似荷青黃莖赤有節節有枝相當
或云藟似地黃詩唐風云采苓采苓首陽之巔是也藟與苓通
用首陽之山在河東蒲坂縣乃今甘草所生處相近而先儒所
說苗葉與今全別豈種類有不同者乎張仲景傷寒論有一物
甘草湯甘草附子甘草乾薑甘草瀉心等湯諸方用之最多又
能解百毒爲衆藥之要孫思邈論云有人中烏頭巴豆毒甘草

入腹卽定方稱大豆解百藥毒嘗試之不效乃加甘草爲甘豆湯其驗更速又備急方云席辯刺史嘗言嶺南俚人解毒藥並是常用物畏人得其法乃言三百頭牛藥或言三百兩銀藥辯久住彼與之親狎乃得其實凡欲食先取甘草一寸炙熟嚼咽汁若中毒隨卽吐出乃用都淋藤黃藤二物酒煎令溫常服毒隨大小便出都淋藤者出嶺南高三尺餘甚細長所謂三百兩銀藥也又常帶甘草十數寸隨身以備緩急若經含甘草而食物不吐者非毒也崔元亮海上方治發背秘法李北海云此方神授極奇祕以甘草三大兩生搗別篩末大麥麩九兩於一大

盤中相和攪令勻取上好酥少許別捻入藥令勻百沸水漉如餅劑方圓大於瘡一分熱傳腫上以油片及故紙隔令通風冷則換之已成膿水自出未成膿便內消當患腫著藥時常須喫黃耆粥甚妙又一法甘草一大兩微炙搗碎水一大升浸之器上橫一小刀子置露中經宿平明以物攪令沫出吹沫服之但足瘡腫發背皆可服甚效

游宦紀聞夷堅志載虞雍公自渠州守召至行在憇北郭外接待院因道中冒暑得疾瀉痢連月重九日夢至一處類神仙居一人被服如仙官延坐視壁閒有韻語藥方讀之其詞曰暑毒

在脾濕氣連腳不泄則痢不痢則瘧獨鍊雄黃蒸餅和藥甘草
作湯服之安樂別法治之醫家大錯如方服之遂愈世南在蜀
中徧訪林下人求獨鍊法鮮有能者忽一日得青城山道友傳
授云丹經謂捉得龍伏得雄言雄黃見火則飛走爲烟焰最難
伏也其法用雄黃不拘多少研細乾鍋火內煅令通紅取出攪
雄黃末入焰硝內急用桃枝攪轉卽成水矣急傾出瓦碟內微
側碟子則清者一邊俟凝取出去麤者研細以宿蒸餅爲元如
菘荳大每服三元至七元如前法服雄黃末一兩大約用焰硝
一錢此乃丹竈家秘法得之甚難古人云施藥不如施方故詳

記之

夢溪筆談本草注引爾雅云藟大苦注甘草也蔓延生葉似荷莖青赤此乃黃蘗也其味極苦謂之大苦非甘草也甘草枝葉悉如槐高五六尺但葉端微尖而糙澀似有白毛實作角生如相思角作一本生熟則角垢子如小扁豆極堅齒嚙不破

本草綱目李時珍曰今人惟以大徑寸而結緊斷紋者爲佳謂之粉草其輕細小者皆不及之鎰積霏雪錄言安南甘草大者如柱土人以架屋不識果然否也

避暑錄話兵興以來盜賊夷狄所及無噍類有先期犇避伏匿

山谷林莽間者或幸以免忽襁負嬰兒啼聲聞於外亦因得其處於是避賊之人凡嬰兒未解事不可戒語者率棄之道傍以去纍纍相望有教之爲編毬隨兒大小爲之縛置口中略使滿口而不閉氣或有力更預畜甘草末臨繫時量以水漬使咀味兒口中有物自不能作聲而編軟不傷兒口或鏤板以揭饒州道上已酉冬虜自江西犯饒廣所在居民皆空城去顛仆流離道上而嬰兒得此全活者甚多

說文解字注昔甘艸也所謂藥中國老安和七十二種石一千二百種艸者也從艸甘聲此以形聲包會意古三切八部

又苦大苦苓也見擲風唐風毛傳釋艸苓作藎孫炎注云今甘
艸也按說文甘字解云甘艸矣倘甘艸又名大苦又名苓則何
以不類列而剖分異處乎且此云大苦苓也中隔百數十字又
出藎篆云大苦也此苓必改爲藎而後畫一卽畫一之又何以
不類列也攷周時音韻凡令聲皆在十二部今之眞臻先也凡
雷聲皆在十一部今之庚耕清青也簡兮苓與榛人韻采苓苓
與顛韻倘改作藎則爲合音而非本韻然則釋艸作藎不若毛
詩爲善許君斷非於苦下襲毛詩於藎下襲爾雅剖分兩處前
後不相顧也後文藎篆必淺人據爾雅妄增而此大苦苓也固

不誤然則大苦卽卷耳與曰非也毛傳爾雅皆云卷耳苓耳說
文苓篆下必當云苓耳卷耳也今本必淺人刪其苓耳字卷耳
自名苓耳非名苓凡合二字爲名者不可刪其一字以同於他
物如單云蘭非茺蘭單云葵非鳧葵是也此大苦斷非苓耳而
苦篆苓篆不類廁又其證也然則大苦何物曰沈括筆談云爾
雅薑大苦注云蔓延生葉似荷青莖赤此乃黃蘗也其味極苦
謂之大苦郭云甘草非也甘草枝葉全不同苦爲五味之一引
伸爲勞苦

廣雅疏證美丹甘草也爾雅所謂薑大苦也邶風簡兮篇隰有

苓苓與藟同傳云苓大苦正義引孫炎爾雅注云本草云藟今甘草是也蔓延生葉似荷青黃其莖赤有節節有枝相當或云藟似地黃郭璞注同案大苦者大芩也爾雅云芩地黃芩苦古字通公食大夫禮羊苦今文苦爲芩是也藟似地黃故一名大苦沈括筆談云郭璞注乃黃藥也其味極苦故謂之大苦非甘草也甘草枝葉悉如槐案宋本草圖經謂甘草葉如槐與古相違殊不足信苦乃芩之假借非以其味之苦也據圖經黃藥葉似蕎麥而大苦葉乃似荷似地黃形狀亦不同不審括何以知爲黃藥淮南覽冥訓云甘草主生肉之藥神農本草亦云甘草

味甘主長肌肉一名蜜甘一名美草美草與美丹同意殆取其
味之甘美與孫炎據本草以藟爲甘草今本草無復藟名蓋傳
者失之名醫別錄云一名蜜草一名露草生河西川谷積沙山
及上郡又云木甘草生木間三月生大葉如蛇牀四四相值然
則木甘草亦是枝葉相當孫炎謂甘草枝相當得其實矣

赤箭

本草經赤箭味辛溫主殺鬼精物蠱毒惡氣久服益氣力長陰肥健輕身增年一名離母一名鬼督郵

別錄主消癰腫下支滿寒疝下血生陳倉川谷雍州及太山少室三月四月八月採根暴乾陶隱居云陳倉屬雍州扶風郡按此草亦是芝類其莖赤如箭幹葉生其端根如人足又云如芋有十二子爲衛有風不動無風自搖如此亦非俗所見而徐長卿亦名鬼督郵又復有鬼箭莖有羽主療並相似而益大乖異恐非此赤箭

圖經赤箭生陳倉川谷雍州及泰山少室今江湖間亦有之然
不中藥用其苗獨莖如箭薺葉生其端四月開花幹葉俱赤實
似枯苦楝子核作五六棱中有肉如麩日暴則枯萎其根大類
天門冬惟無心脈耳去根五六寸有十餘子爲衛似芋三月四
月八月採根暴乾今三月四月採苗七月八月九月採根謹按
此草有風不動無風則自搖抱朴子云按仙方中有合離草一
名獨搖一名離母所以謂之合離離母者此草爲物下根如芋
魁有游子十二枚馬環之云大魁數尺雖相須而實不連但以
氣相屬耳如菟絲之草下有伏菟之根無此菟絲不得上亦不

相屬也然則赤箭之異陶隱居已云此亦非俗所見菟絲之下
有伏菟亦不復聞有見者殆其種類中時有神異者乃如此耳
又陶蘓皆云赤箭是芝類而上有六芝條五芝皆以五色生於
五嶽諸方所獻者紫芝生高夏山谷蘓云芝多黃白稀有黑青
者紫芝最多非五芝類但芝自難得縱獲一二豈得終久服邪
今山中雖時復有之而人莫能識其真醫家絕無用者故州郡
亦無圖上蓋祥異之物非世常有但附其說於此耳

夢溪筆談赤箭卽今之天麻也後人旣誤出天麻一條遂指赤
箭別爲一物旣無此物不得已又取天麻苗爲之茲爲不然本

草明稱採根陰乾安得以苗爲之草藥上品除五芝之外赤箭爲第一此神仙補理養生上藥世人惑於天齊之說遂止用之治風良可惜哉以謂其莖如箭旣言赤箭疑當用莖此尤不然至如鳶尾牛膝之類皆謂莖葉有所似則用根耳何足疑哉本草綱目李時珍曰沈公此說雖是但根莖並皆可用天麻子從莖中落下俗名還筒子其根暴乾肉色堅白如羊角色呼羊角天麻蒸過黃皺如乾瓜者俗呼醬瓜天麻皆可用者形尖而空薄如元參狀者不堪用

天麻

嘉祐本草天麻味辛平無毒主諸風濕痺四肢拘攣小兒風癩驚氣利腰膝強筋力久服益氣輕身長年生鄆州利州太山嶗山諸山五月採根暴乾註葉如芍藥而小當中抽一莖直上如箭葶莖端結實狀若續隨子至葉枯時子黃熟其根連一二十枚猶如天門冬之類形如黃瓜亦如蘆菔大小不定彼人多生噉或蒸煮食之今多用鄆州者佳

圖經天麻生鄆州利州泰山嶗山諸山今京東京西湖南淮南州郡亦有之春生苗初出若芍藥獨抽一莖直上高二三尺如

箭藟狀青赤色故名赤箭芝莖中空依半以上帖莖微有尖小葉梢顛生成穗開花結子如豆粒大其子至夏不落卻透虛入莖中潛生土內其根形如黃瓜連生一二十枚大者有重半斤或五六兩其皮黃白色名白龍皮肉名天麻二月三月五月八月內採初取得乘潤刮去皮沸湯畧煮過暴乾收之嵩山衡山人或取生者蜜煎作果食之甚珍

別說謹按赤箭條下所說甚詳今就此考之尤爲分明詳此圖經之狀卽赤箭苗之未長大者二說前後自不同則所爲紫花者又不知是何物也若依赤箭條後用之爲是

枹朴子獨搖芝生高山深谷其生左右無草根有大魁如斗纏者如雞子十二枚繞之人得大者服之延年

酉陽雜俎合離根如芋魁有游子十二環之相須而生而實不連以氣相屬一名獨搖一名離母言若土人所食者合呼爲赤箭

東坡雜記世傳四味五兩天麻煎蓋古方本以四時加減世但傳春利耳春肝主多風故倍天麻夏伏陰故倍烏頭秋多利下故倍地榆冬伏陽故倍元參當須去皮生用治之萬搗烏頭無復毒依此常服不獨去病乃保真延年與仲景八味丸並驅矣

朮

本草經朮味苦溫主風寒濕痺死肌瘞疽止汗除熱消食作煎
餌久服輕身延年不飢一名山薊

爾雅朮山薊註本草云朮一名山薊今朮似薊而生山中

別錄甘無毒主大風在身面風眩頭痛目淚出消痰水逐皮間
風水結腫除心下急滿及霍亂吐下不止利腰臍間血益津液
暖胃消穀嗜食一名山薑一名山連生鄭山之谷漢中南鄭二
月三月八月九月採根暴乾防風地榆爲之使陶隱居云鄭山
南鄭也今處處有以蔣山白山茅山者爲勝十一月十二月正

月二月採好多脂膏而甘仙經云亦能除惡氣弭災疹丸散煎
餌並有法其苗又可作飲甚香美去水朮乃有兩種白朮葉大
有毛而作極根甜而少膏可作丸散用赤朮葉細無極根小苦
而多膏可作煎用昔劉涓子援取其精而丸之名守中金丸可
以長生東境朮大而無氣烈不任用今市人賣者皆以米粉塗
令白非自然用時宜刮去之

抱朴子云朮名山精故神農藥經曰必欲長生常服山精

圖經朮生鄭山山谷漢中南鄭今處處有之以嵩山茅山者爲
佳春生苗青色無極一名山薊以其葉似薊也莖作蒿薜狀青

赤色長三二尺以來夏開花紫碧色亦似刺薊花或有黃白花者入伏後結子至秋而苗枯根似薑而傍有細根皮黑心黃白色中有膏液紫色二月三月八月九月採暴乾乾濕並通用今八月採之服食家多單餌之或合白茯苓或合石菖蒲並搗末水調服旦日服晚再進久久彌佳又斲取生朮去土水浸再煎如飴糖酒調飲之更善今茅山所製朮煎是此法也陶隱居云昔者劉涓子援取其精而九之名守中金丸今傳其法乃是膏煎恐非真耳謹按朮有二種爾雅云朮山薊楊枹薊釋曰此辯薊生山中及平地者名也生平地名薊生山中名朮陶注本草

云白朮葉大而有毛甜而少膏赤朮細苦而多膏是也其生平地而肥大於衆者名楊枹蘄今呼之爲蘄然則楊枹卽白朮也今白朮生杭越舒宣州高山岡上葉葉相對上有毛方莖莖端生花淡紫碧紅數色根生椹二月三月八月九月採根暴乾以大塊紫花者爲勝又名乞力伽凡古方云朮者乃白朮也非謂今之朮矣

本草衍義蒼朮其長如大拇指肥實皮褐色氣辛烈須米泔浸洗再換泔浸二日去上麤皮白朮麤促色微褐氣味亦微辛苦而不烈古方及本經止言朮未見分其蒼白二種也緣陶隱居言

朮有兩種自此人多貴白者今人但貴其難得惟用白者往往將蒼朮置而不用如古方平胃散之類蒼朮爲最要藥功朮速殊不詳本草元無白朮名近世多用亦宜兩審嵇康曰聞道人遺言餌朮黃精令人久壽亦無白字

南方草木狀藥有乞力伽朮也瀕海所產一根有至數斤者劉涓子取以作煎令可丸餌之長生

敬齋古今薺江南野錄載韓熙載服朮食桃李瀉十數朮人長寸餘而卒予友張君者服蒼朮幾三十年尤喜食桃李未聞有此異也嘉祐本草蒼白二朮不別出但於蒼朮條下引藥性論

云白朮忌桃李雀肉菘菜青魚豈熙載所服者乃白朮非蒼朮而然歟

救荒本草蒼朮近郡山谷亦有嵩山茅山者桂苗淡青色高二三尺莖作蒿藜葉插莖而生梢葉似棠梨葉腳葉有三五叉皆有鋸齒小刺開花深碧色亦似刺薊或有黃白花者根長如指大而肥實皮黑茶褐色味苦甘採根去黑皮薄切浸二三宿去苦味煮熟食亦作煎

本草綱目李時珍曰蒼朮處處山中有之苗高二三尺其葉抱莖而生梢間葉似棠梨葉其腳下葉有三五叉皆有鋸齒小刺

根如老薑之狀蒼黑色肉白有油膏白朮也吳越有之人多取
根栽蒔一年自獨嫩苗可茹葉稍大而有毛根如指大狀如鼓
槌亦有大如拳者彼人剖開暴乾謂之削朮亦曰片朮陳自良
言白而肥者是漑朮瘦而黃者是幕阜山所出其刀劣昔人用
朮不分赤白自宋以來始言蒼朮苦辛氣烈白朮苦甘氣和各
自施用亦頗有理並以秋采者佳春採者虛軟易壞嘉謨曰浙
朮俗名雲頭朮種平壤頗肥大由糞力也易潤油欵朮俗名狗
頭朮雖瘦小得土氣充也甚燥白勝於浙朮寧國昌化池州者
並同欵朮境相隣也

又曰按吐納經云紫微夫人朮序云吾察草木之勝速益於己者並不及朮之多驗也可以長生久視遠而更靈山林隱逸得服朮者五嶽比肩又神仙傳云陳子皇得餌朮要方其妻姜氏得疲病服之自愈顏色氣力如二十時也時珍謹按以上諸說皆似蒼朮不獨白朮今服食家亦呼蒼朮爲仙朮故皆列於蒼朮之後又張仲景辟一切惡氣用赤朮同豬蹄甲燒烟陶隱居亦言朮能除惡氣弭災沴故今病疫及歲旦人家往往燒蒼朮以辟邪氣類編載越民高氏妻病恍惚譫言亡夫之鬼憑之其家燒蒼朮烟鬼遽求去夷堅志載江西一士人爲女妖所染其

鬼將別曰君爲陰氣所侵必當暴泄但多服平胃散爲良中有
蒼朮能去邪也許叔微本事方云微患飲癖三十年始因少年
夜坐寫文左向伏几是以飲食多墜左邊中夜必飲酒數杯又
向左卧壯時不覺三五年後覺酒止從左下有聲脇痛食減嘈
雜飲酒半杯卽止十數日必嘔酸水數升暑月止右邊有汗左
邊絕無遍訪名醫及海上方間或中病止得月餘復作其補如
玉雄附子礬石輩利如牽牛甘遂大戟備嘗之矣自揣必有癖
囊如水之有科白不盈科不行但清者可行而濁者停滯無路
以決之故積至五七日必嘔而去脾土惡濕而水則流濕莫若

燥脾以去濕崇土以填科白乃悉屏諸藥只以蒼朮一斤去皮切片爲末麻油半兩水二瓊研濾汁大棗五十枚煮去皮核搗和丸梧子大每日空腹溫服五十九增至一二百丸忌桃李雀肉服三月而疾除自此常服不嘔不痛胸膈寬利飲啖如故暑月汗亦周身燈下能書細字皆朮之力也初服時必覺微燥以山卮子末沸湯點服解之久服亦自不燥矣

蘇翰記范文正公所居宅必先浚井納青朮數斤於其中以蒼朮詣去濕

康洪眼曰昔漁翁食此甚多就野買一斤數錢爾此長生藥

也人以爲易得不復貴重至以薰蚊子此亦可爲太息舒州白朮莖葉亦甚相似特華紫耳然甚難得三百一兩其效止於和胃去游風非神仙上藥

顏氏家訓爾雅云朮山薊也郭璞注云今朮似薊而生山中按朮葉其體似薊近世文士遂讀薊爲筋肉之筋以耦地骨用之恐失其義

仙傳拾遺劉商者中山靖王之後舉孝廉歷官合肥令而篤好無爲清簡之道方術服鍊之門五金八石所難致者必力而求之人有方疏未合鍊施效者必資其藥石給其鑪鼎助使成之

未嘗有所覬覦也因泛舟茗書間遂卜居武康上強山下有樵
童藥叟雖常草木之藥詣門而售者亦答以善價一旦樵夫鬻
樵有朮一把商亦厚價致之其庭廡之下籬落之間草朮諸藥
已堆積矣忽聞步杖策逍遙田畝蹊隧之傍聊自怡逸聞藜林
間有人相與言曰中山劉商今日已賜真朮矣蓋陰功篤好之
所感乎窺林中杳無人跡奔歸取朮修而服之月餘齒髮益盛
貌如嬰童舉步輕速可及馳馬登涉雲巖無復困憊

爾雅正義朮山薊註本草云朮一名山薊今朮似薊而生山中
楊枹薊註似薊而肥大今呼之馬薊正義此別朮之名類也朮

之生於山者名山薊楊一名枹薊卽朮也朮說文作荒繫傳以爲荒苗似薊也中山經云首山多荒芜郭氏彼註云荒山薊也今朮以山中自生者爲良故山薊直名之曰朮枹薊亦朮之類徐鍇以爲卽今赤朮是也註本草至山中正義朮一名山薊神農本草之舊文後代名醫增益則曰一名山薑一名山連又引吳普本草云一名山芥一名天蘇所以廣異名也惟山薊之名合於爾雅餘皆方俗異語爾陶宏景云朮乃有兩種白朮葉大有毛而作枹根甜而少膏赤朮葉細無枹根小苦而多膏案爾雅別山薊枹薊之名陶註分朮爲二種者是也郭云朮似薊而

生山中者顏之推以爲朮葉其體似薊徐鍇謂朮形似刺薊但
萼別似杜鵑而青紫耳似薊至馬薊正義郭意以枹薊較大於
山薊也後人釋本草者以枹薊爲白朮蓋徒見於陶註謂白朮
葉大而傳合其名殊不知郭氏所云肥大者不專指葉而言也
今赤朮苗高二三尺葉抱莖而生色似棠梨近根之葉岐出若
鋸齒蟠根如蘆較白朮爲肥大當從徐鍇之說以赤朮爲枹薊
也一名馬薊者枹馬聲之轉今人呼爲蒼朮

廣雅疏證山薑荒也爾雅朮山薊郭注云今朮似薊而生山中
中山經云首山其陰多荒芫又云女几之山其草多薊荒神農

本草云朮一名山薊生鄭山藝文類聚引范子計然云朮出三輔黃白色者善又引吳普本草云朮一名山連一名山芥一名天蘇一名山薑名醫別錄云生漢中南鄭陶注云今處處有以蔣山白山茅山者爲勝多脂膏而甘去水朮乃有兩種白朮葉大有毛而作極根甜而少膏赤朮葉細無極根小苦而多膏蘇頌圖經云苗青色幹青赤色華紫碧色庾肩吾荅陶隱居賚朮煎啟云綠葉抽條生於首峯之側紫華標色出自鄭巖之下是也圖經又云葉似薊根似薑然則山薊以葉得名山薑以根得名也抱朴子僊藥篇云朮一名山精故神藥經云必欲長生常

本草綱目卷之
服山精此方術家語耳然藝文類聚引崔寔四民月令云二月
採朮則古人多有服食之者

沙參

本草經沙參味苦微寒主血積驚氣除寒熱補中益肺氣久
利人一名知母

別錄無毒療胃痺心腹痛結熱邪氣頭痛皮間邪熱安五臟補
中一名苦心一名志取一名虎鬚一名白參一名識美一名文
希生河內川谷及宛句般陽續山二月八月採根暴乾陶隱居
云今出近道叢生葉似枸杞根白實者佳此沙參並人參是爲
五參其形不盡相類而主療頗同故皆有參名又有紫參正名

牡蒙在中品

唐本草註云紫參牡蒙各是一物非異名也今沙參出華州爲善

圖經沙參生河內川谷及宛句般陽續山今出淄齊潞隨州而江淮荆湖州郡或有之苗長一二尺以來叢生崖壁間葉似枸杞而有叉牙七月開紫花根如葵根指許大赤黃色中正白實者佳二月八月採根暴乾南土生者葉有細有大花白瓣上仍有白黏膠此爲小異古方亦單用葛洪卒得諸疝小腹及陰中相引痛如絞自汗出欲死者搗篩末酒服方寸匕立差

救荒本草沙參今輝縣太行山邊亦有之苗長一二尺叢生崖

坡間葉似枸杞葉微長而有叉牙鋸齒開紫花根如葵根赤黃色中正白實者佳掘根浸洗極淨換水煮去苦味再以火煮極熟食之

救荒本草細葉沙參生輝縣太行山山衝間苗高一二尺莖似蒿蕻葉似石竹子葉而細長又似水蓼衣葉亦細長梢間開紫花根似葵根而麤如拇指大皮色灰中間白色味甜性微寒本草有沙參苗葉莖狀所說與此不同掘取根洗淨煮熟食之

本草綱目李時珍曰沙參處處山原有之二月生苗葉如初生小葵葉而團扁不光八九月抽莖高一二尺莖上之葉則尖長

如枸杞葉而小有細齒秋月葉間開小紫花長二三分狀如鈴鐸五出白蕊亦有白花者並結實大如冬青實中有細子霜後苗枯其根生沙地者長尺餘大一虎口黃土地者則短而小根莖皆有白汁八九月採者白而實春月採者微黃而虛小人亦往往繫蒸壓實以亂人參但體輕鬆味淡而短耳

遠志

本草經遠志味苦溫主欬逆傷中補不足除邪氣利九竅益智
慧耳目聰明不忘強志倍力久服輕身不老葉名小草一名棘
菹一名萋繞一名細草

爾雅萋繞棘菹註今遠志也似麻黃赤華葉銳而黃其上謂之
小草廣雅云

別錄無毒主利丈夫定心氣止驚悸益精去心下膈氣皮膚中
熱面目黃好顏色延年主益精補陰氣止虛損夢洩生太山及
宛句川谷四月採根葉陰乾畏齊蛤陶隱居按藥名無齊蛤恐

是百合寃句縣屬兗州濟陰郡今獨從彭城北蘭陵來用之可
去心取皮今用一斤止得三兩皮爾市者加量之小草狀似麻
黃而青遠志亦入仙方藥用

圖經遠志生泰山及寃句川谷今河陝京西州郡亦有之根黃
色形如蒿根苗名小草似麻黃而青又如畢豆葉亦有似大青
而小者三月開花白色根長及一尺四月採根葉陰乾今云曬
乾用泗州出者花紅根葉俱大於它處商州者根又黑色俗傳
夷門遠志最佳古本通用遠志小草今醫但用遠志稀用小草
古今錄驗及范汪方治胸痺心痛逆氣膈中飲不下小草丸小

草桂心蜀椒去汗乾薑細辛各三兩附子二分炮六物合搗下篩和以蜜丸大如梧子先食米汁下三九日三不知稍增以知爲度禁豬肉冷水生蔥菜

救荒本草遠志俗傳夷門遠志最佳今蜜縣梁家衝山谷間多有之苗名小草葉似石竹子葉又極細開小紫花亦有開小紅白花者根黃色形如蒿根長及一尺許亦有根黑色者根葉俱味苦採嫩苗葉燂熟換水浸去苦味淘淨油鹽調食及掘取根換水煮浸淘去苦味去心再換水煮極熟食之不去心令人心

悶

本草綱目李時珍曰遠志有大葉小葉二種陶宏景所說者小葉也馬志所說者大葉也大葉者花紅

詩經四月秀葍傳不榮而實曰秀葍葍草也箋夏小正四月王
蕢秀葍其是乎物成自秀葍始疏釋草云華榮也木謂之華草
謂之榮不榮而實者謂之秀榮而不實者謂之英李迥曰分別
異名以曉人則彼以英秀對文故以英爲不實秀爲不榮出車
云黍稷方華生民說黍稷云實發實秀是黍稷有華亦稱秀也
言其秀實知葍是草也夏小正大戴禮篇名葍之爲草書傳無
文四月已秀物之鮮矣故疑王蕢正與葍爲一月令孟夏王瓜

生注云今日王蕢生夏小正云王蕢秀未詳孰是鄭以四月生者自是王瓜今月令與夏小正皆作王蕢而生秀字異必有誤者故云未知孰是本草云蕢生田中葉青刺人有實七月采陰乾云七月采之又非四月已秀是蕢與否未能審之

抱朴子內篇陵陽子仲服遠志二十年有子三十七人能坐在立亡也

廣雅疏證蕢苑遠志也其上謂之小草爾雅蕢繞蕢苑郭注云今遠志也似麻黃赤華葉銳而黃其上謂之小草見廣雅苑與苑通上謂臺也爾雅莞苻離其上蒿郭注云謂其頭臺首也是

也急就篇云遠志續斷參土瓜神農本草云遠志葉名小草一名棘苑一名萋繞一名細草名醫別錄云生太山及宛句川谷陶注云小草狀似麻黃而青博物志云苗曰小草根曰遠志世說排調篇郝隆譏謝安云處則爲遠志出則爲小草又御覽引魏氏春秋同異云但有遠志不見當歸蓋昔人多假借遠志之名以爲喻然命名之本義或未必然也

萎蕤

本草經女萎味甘平主中風暴熱不能動搖跌筋結肉諸不足
久服去面黑黥好顏色潤澤輕身不老

爾雅熒委萎註藥草也葉似竹大者如箭竿有節葉狹而長表
白裏青根大如指長一二尺可啖

別錄萎蕤無毒主心腹結氣虛熱濕毒腰痛莖中寒及目痛眦
爛淚出一名熒一名地節一名玉竹一名馬薰生太山山谷及
丘陵立春後採陰乾陶隱居云按本經有女萎無萎蕤別錄無
女萎有萎蕤而爲用正同疑女萎卽萎蕤也惟名異爾今處處

有其根似黃精而小異服食家亦用之今市人別用一種物根形狀如續斷莖味不苦乃言是女青根出荊州今療下痢方多用女萎而北都有止洩之說疑必非也萎蕤又主理諸石人服石不調和者煮汁飲

圖經萎蕤生太山山谷邱陵今滁州舒州及漢中皆有之葉狹而長表白裏青亦類黃精莖莖強直似竹箭莖有節根黃多鬚大如指長一二尺或云可噉三月開青花結圓實立春後採根陰乾用之本經與女萎同條云是一物二名又云自是二物苗蔓與功用全別爾雅謂萎萎郭璞註云藥草也亦無女萎之

別名疑別是一物且本經中品又別有女萎條蘇恭云卽此女
萎今本經朱書是女萎能效黑字是萎蕤之功觀古方書所用
則似差別胡洽治時氣洞下墮下有女萎丸治傷寒冷下結腸
丸中用女萎治虛勞小黃耆酒云下痢者加女萎詳此數方所
用乃似中品女萎緣其性溫主霍亂洩痢故也又主賊風手足
枯痺四肢拘攣茵芋酒中用女萎及古今錄驗治身體癱瘍斑
駁女萎膏乃是朱書女萎緣其主中風不能動搖及去奸好色
故也又治傷寒七八日不解續命鼈甲湯治腳弱鼈甲湯並用
萎蕤及延年方主風熱項急痛四肢骨肉煩熱萎蕤飲又主虛

風熱發卽頭痛萎蕤丸乃似此墨書萎蕤緣其主虛熱濕毒腰痛故也二者主治旣別則非一物明矣然陳藏器以爲更非二物是不然矣此萎蕤性平味甘中品女萎味辛性溫性味旣殊安得爲一物又云萎蕤一名地節極似偏精疑卽青黏華佗所服漆葉青黏散是此也然世無復能辯者非敢以爲信然也

救荒本草萎蕤今南陽府馬鞍山有之苗高一二尺莖斑葉似竹葉濶短而肥厚葉尖處有黃點又似百合葉卻頗窄小葉下結青子如椒粒大其根似黃精而小異節上有鬚採根換水煮極熟食之

王右軍女萎丸帖知足下哀感不佳耿耿吾下勢腹痛小差須用女萎丸得應甚速也

東坡辨青黏散方按嘉祐補注本草女萎條注引陳藏器云女萎萎蕤二物同傳陶云同是一物但名異耳下痢方多用女萎而此都無止洩之說疑必非也按女萎蘇又於中品之中出之云主霍亂洩痢腸鳴正與陶注上品女萎相會如此卽二萎功用同矣更非二物蕪乃剩出一條蕪又云女萎與萎蕤不同其萎蕤一名玉竹葉似竹一名地節爲有節魏志樊阿傳青黏一名黃芝一名地節此卽萎蕤極似偏精本功外主聰明調血氣

令人強壯和漆葉爲散主五臟益精去三蟲輕身不老變白潤
肌膚暖腰腳惟有熱不可服晉嵇紹有胸中寒疾每酒後苦唾
服之得愈草似竹取根花葉陰乾昔華佗入山見仙人服之以
告樊阿服之百歲右予少時讀後漢書三國志華佗傳皆云佗
弟子樊阿從佗求可服食益於人者佗授以漆葉青黏散漆葉
屑一升青黏屑十四兩以是爲率言久服去三蟲利五臟輕體
使人頭不白阿從其言壽百餘歲漆葉處所皆有青黏生於豐
沛彭城及朝歌魏志注引佗別傳云青黏一名地節一名黃芝
主理五臟益精氣本出於陝入山者見仙人服之以告佗佗以

爲佳輒語阿大祕之近者人見阿之壽而氣力强盛皆怪之遂
責阿所服因醉亂誤道之法一施人多服者皆有大驗而後漢
注亦引作別傳此文但黏字書粘字相傳音女廉反然今人
無識此者甚可恨惜吾詳作文恨惜不識之語乃章懷太子賢
所云也吾性好服食每以問好事君子莫有知者紹聖四年九
月十三日在昌化軍借嘉祐補注本草乃知是女萎喜躍之甚
登卽錄之但恨陶隱居與蘓恭二論未決恭唐人今本草云唐
本者皆恭注也詳其所論多立異又殊喜與陶公相反幾至於
罵者然細考之陶未必非恭未必是予以謂隱居精識博物可

信當更以問能者若青黏便是菱麩豈不一大慶乎過當錄此
寄子由同講求之

巴戟天

本草經巴戟天味辛微溫主大風邪氣陰痿不起強筋骨安五臟補中增志益氣

別錄甘無毒主療頭面遊風小腹及陰中相引痛下氣補五勞益精利男子生巴郡及下邳山谷二月八月採根陰乾陶隱居云今亦用建平宜都者根狀如牡丹而細外赤內黑用之打去心

唐本草註云巴戟天苗俗方名三蔓草葉似茗經冬不枯根如連珠多者良宿根青色嫩根白紫用之亦同連珠肉厚者爲勝

圖經巴戟天生巴郡及下邳山谷今江淮河東州郡亦有之皆不及蜀州者佳葉似茗經冬不枯俗名三蔓草又名不凋草多生竹林內布地生者葉似麥門冬而厚大至秋結實二月八月採根陰乾今多焙之有宿根者青色嫩根者白色用之皆同以連珠肉厚者勝今方家多以紫色爲良蜀人云都無紫色者彼方人採得或用黑豆同煎欲其色紫此殊失氣味尤宜辯之一說蜀中又有一種山律根正似巴戟但色白土人採得以醋水煮之乃紫以雜巴戟莫能辯也眞巴戟嫩者亦白乾時亦煮治使紫力劣弱不可用今兩種市中皆是但擊破視之其中紫而

鮮潔者偽也眞者擊破其中雖紫又有微白糝如粉色理小暗者眞也

四川志巴戟巴州劍州廣元俱出元和志劍州貢巴戟天重台寰宇記巴州貢巴戟天

植物名實圖考

五

肉蓯蓉

本草經肉蓯蓉味甘微溫主五勞七傷補中除莖中寒熱痛養五臟強陰益精氣多子婦人癥瘕久服輕身

別錄酸鹹無毒主除膀胱邪氣腰痛止痢生河西山谷及代郡鴈門五月五日採陰乾陶隱居云代郡鴈門屬并州多馬處便有言是野馬精落地所生生時似肉以作羊肉羹補虛乏極佳亦可生噉芮芮河南間至多今第一出隴西形扁廣柔潤多花而味甘次出北國者形似而少花巴東建平間亦有而不如也唐本草註云此註論草蓯蓉陶未見肉者今人所用亦草蓯蓉

刮去花用代肉爾本經有肉菹菹功力殊勝比來醫人時有用者

圖經肉菹菹生河西山谷及代郡鴈門今陝西州郡多有之然不及西羌界中來者肉厚而力緊舊說是野馬遺瀝落地所生今西人云大木間及土壅垣中多生此非游牝之所而乃有則知自有種類耳或疑其初生於馬瀝後乃滋殖如茜根生於人血之類是也皮如松子有鱗甲苗下有一細扁根長尺餘三月採根採時掘取中央好者以繩穿陰乾至八月乃堪用本經云五月五日採恐已老不堪故多三月採之西人多用作食品噉

之刮去麟甲以酒洗淨去黑汁薄切合山芋羊肉作羹極美好
益人食之勝服補藥又有一種草菘蓉極相類但根短莖圓紫
色比來人多取刮去花壓令扁以代肉者功力殊劣耳又下品
有列當條云生山南巖石上如藕根初生掘取陰乾亦名草菘
蓉性溫補男子疑卽是此物今人鮮用故少有辨之者因附見
於此

本草補遺河西混一之後今方識其真形何嘗有所謂麟甲者
蓋菘蓉罕得人多以金蓮根用鹽益制而爲之又以草菘蓉充
之用者宜審

二酉委譚甘州多瑣陽肉蓯蓉瑣陽形甚不雅莖上生肉蓯蓉生土中掘得之形甚大色紅鮮如肉助甫欲一識之令卒之田間掘得昇來儼如一大人臂因悟蕪子瞻所烹肉蓯蓉耳宜其不能仙也

升麻

別錄升麻味甘苦平微寒無毒主解百毒殺百精老物殃鬼辟
瘟疫瘴氣邪氣蠱毒入口皆吐出中惡腹痛時氣毒癘頭痛寒
熱風腫諸毒喉痛口瘡久服不夭輕身長年一名周麻生益州
山谷二月八月採根日乾陶隱居云舊出寧州者第一形細而
黑極堅實頃無復有今惟出益州好者細削皮青綠色謂之雞
骨升麻北部間亦有形又虛大黃色建平間亦有形大味薄不
堪用人言是落新婦根不必爾其形自相似氣色非也落新婦
亦解毒取葉按作小兒浴湯主驚忤

圖經升麻生益州川谷今蜀漢陝西淮南州郡皆有之以巴川者爲勝春生苗高三尺以來葉似麻葉並青脆四月五月著花似粟穗白色六月以後結實黑色根紫如蒿根多鬚四月八月採日暴乾今醫家以治咽喉腫痛口舌生瘡解傷寒頭痛凡腫毒之屬殊效細剉一兩水一升煎鍊取濃汁服之入口卽吐毒氣蜀人多用之楊炎南行方療癩疽湯用升麻又有升麻膏升麻煎湯並療諸丹毒等石泉公王方慶嶺南方服乳石補壅法云南方養生治病無過丹砂其方用升麻末三兩研鍊了光明砂一兩二物相合蜜丸如梧子每日食後服三丸又有七物升

麻丸升麻犀角黃芩樸硝梔子大黃各二兩豉二升微熬同搗散蜜丸覺四肢大熱大便秘即服三十丸取微利爲好若四肢小熱於食上服二十九丸非但辟瘴兼甚明目

前漢書地理志益州郡牧靡注李奇曰靡音麻卽升麻殺毒藥所出也

博物志牧靡草可以解毒鳥多誤食中毒必急飛往牧靡山啄牧靡草以解也

水經注涂水出建寧郡之牧靡縣南山縣山並卽草以立名山在縣東北烏句山南五百里山生牧靡可以解毒

酉陽雜俎建寧郡烏句山南五百里生牧靡可以解毒百卉方
盛鳥多誤食烏喙中毒必急飛牧靡山啄牧靡以解

丹參

本草經丹參味苦微寒主心腹邪氣腸鳴幽幽如走水寒熱積聚破癥除瘕止煩滿益氣一名郟蟬草

別錄無毒養血去心腹痼疾結氣腰脊強腳痺除風邪留熱久服利人一名赤參一名木羊乳生桐栢山川谷及太山五月採根暴乾陶隱居云此桐栢山是淮水源所出之山在義陽非江東臨海之桐栢也今近道處處有莖方有毛紫花時人呼爲逐馬酒漬飲之療風痺道家時有用處時人服之多眼赤故應性熱今云微寒恐爲謬矣

日華子養神定志通利關脈治冷熱勞骨節疼痛四肢不遂排
膿止痛生肌長肉破宿血生新血安生胎落死胎止血崩帶下
調婦人經脈不勻血邪心煩惡瘡疥癬癭贅腫毒丹毒頭痛赤
眼熱溫狂悶又名山參

圖經丹參二月生苗高一尺許莖幹方稜青色葉生相對如薄
荷而有毛三月開花紅紫色似蘇花根赤大如指長尺餘一苗
數莖

本草綱目李時珍曰處處山中有之一枝五葉葉如野蘇而尖
青色皺毛小花成穗如蛾形中有細子其根皮丹而肉紫

徐長卿

本草經徐長卿味辛溫主鬼物百精蠱毒疫疾邪惡氣溫瘧久服強悍輕身一名鬼督郵

別錄無毒益氣延年生太山山谷及隴西三月採陶隱居云鬼督郵之名甚多今俗用徐長卿者其根正如細辛小短扁扁爾氣亦相似今狗脊散用鬼督郵當取其強悍宜腰腳所以知是徐長卿而非鬼箭赤箭

唐本草註云此藥葉似柳兩葉相當有光潤所在川澤有之根如細辛微麤長而有臊氣今俗用代鬼督郵非也鬼督郵別有

本條在下

蜀本草圖經云苗似小桑兩葉相對三月苗青七月八月著子似蘿摩子而小九月苗黃十月凋生下濕川澤之間今所在有之八月採日乾

圖經徐長卿生太山山崑谷及隴西今淄齊淮泗間亦有之三月生青苗葉似小桑兩兩相當而有光潤七八月著子似蘿摩而小九月苗黃十月而枯根黃色似細辛而瓮長有臊氣三月四月採一名別仙蹤

防風

本草經防風味甘溫主大風頭眩痛惡風風邪目盲無所見風行周身骨節疼痺煩滿久服輕身一名銅芸

別錄辛無毒主脅痛脅風頭面去來四肢攣急字乳金瘡內瘰葉主中風熱汗出一名苗草一名百枝一名屏風一名藺根一名百蜚生沙苑川澤及邯鄲瑯邪上蔡二月十月採根暴乾陶隱居云郡縣無名沙苑今第一出彭城蘭陵卽近琅邪者鬱州百市亦得之次出襄陽義陽縣界亦可用卽近上蔡者惟實而脂潤頭節堅如蚯蚓頭者爲好俗用療風最要道方時用

圖經防風生沙苑川澤及邯鄲上蔡今京東淮浙州郡皆有之
根土黃色與蜀葵根相類莖葉俱青綠色莖深而葉淡似青蒿
而短小初時嫩紫作菜茹極爽口五月開細白花中心攢聚作
大房似蒔蘿花實似胡荽而大二月十月採根暴乾關中生者
三月六月採然輕虛不及齊州者良又有石防風出河中府根
如蒿根而黃葉青花白五月開花六月採根暴乾亦療頭風眩
痛又宋毫間及江東出一種防風其苗初春便生嫩時紅紫色
彼人以作菜茹味甚佳然云動風氣本經云葉主中風熱汗出
與此相反恐別是一種耳

救荒本草防風今中牟田野中有之根土黃色與蜀葵根相類
稍細短莖葉俱青綠色莖深而葉淡葉似青蒿葉而濶大又似
米蒿葉而稀疏莖似茴香開細白花結實似胡荽子而大味甘
辛又有叉頭者令人發狂叉尾者發癩疾採嫩苗葉作菜茹燂
熟極爽口

本草綱目李時珍曰江淮所產多是石防風生於山石之間二
月採嫩苗作菜辛甘而香呼爲珊瑚菜其根粗醜其子亦可種
吳綬云凡使以黃色而濶者爲佳白者多沙條不堪

唐書甄權傳權後以醫顯者義興許裔宗裔宗仕陳爲新蔡王

外兵參軍王太后病風不能言脈沈難對醫家告術窮裔宗曰
餌液不可進卽以黃耆防風煮湯數十斛置牀下氣如霧熏薄
之是夕語

金鑾蜜記白居易在翰林賜防風粥一甌剔取防風得五合餘
食之口香七日

獨活

本草經獨活味苦甘平主風寒所擊金瘡止痛賁豚癰瘕女子
疝瘕久服輕身耐老一名羌活一名羌青一名護羌使者

別錄獨活微溫無毒主療諸賊風百節痛風無久新者一名胡
王使者一名獨搖草得風不搖無風自動生雍州川谷或隴西
南安二月八月採根暴乾陶隱居云藥名無豚實恐是蠶實此
州郡縣並是羌地羌活形細節多節軟潤氣息極猛烈生益州北部
西川爲獨活色微白形虛大爲用亦相似而小如其一莖直
上不爲風搖故名獨活至易蛀宜密器藏之

圖經獨活羌活出雍州川谷或隴西南安今用蜀漢出者佳春
生苗葉如青麻六月開花作叢或黃或紫結實時葉黃者是夾
石上生葉青者是土脈中生此草得風不搖無風自動故一名
獨搖草二月八月採根暴乾用本經云二物同一類今人以紫
色而節密者爲羌活黃色而作塊者爲獨活一說按陶隱居云
獨活生西川益州北部色微白形虛大用與羌活相似今蜀中
乃有大獨活類桔梗而大氣味亦不與羌活相類用之微寒而
少效今又有獨活亦自蜀來形類羌活微黃而極大收得寸解
乾之氣味亦芳烈小類羌活又有槐葉氣者今京下多用之極

效驗意此爲真者而市人或擇羌活之大者爲獨活殊未爲當
大抵此物有兩種西蜀者黃色香如蜜隴西者紫色秦隴人呼
爲山前獨活古方但用獨活今方旣用獨活而又用羌活茲爲
謬矣篋中方療中風纔覺不問輕重便須吐涎然後次第治之
吐法用羌活五大兩以水一大斗煎取五升去滓更入好醋半
升和之以牛蒡子半升炒下篩令極細以前湯酒斟酌調服取
吐如已昏眩卽灌之更不可用下藥及謬鍼灸但用補治湯餌
自差

本草綱目李時珍曰獨活羌活乃一類二種以中國者爲獨活

西羌者爲羌活蕪頌所說頗明按王貺易簡方云羌活須用紫色有蠶頭鞭節者獨活是極大羌活有目如鬼眼者尋常皆以老宿前胡爲獨活者非矣近時江淮山中出一種土當歸長近尺許白肉黑皮氣亦芬香如白芷人亦謂之水白芷用充獨活解散亦或用之不可不辨

東坡雜記熟地黃元參當歸羌活各等分列仙傳有山圖者入山採藥折足仙人教服此四物而愈因久服遂度世余以聞名醫康師孟大異之云醫家用此多矣然未有專用此四物如此方者師孟遂名之曰四神丹洛下公卿士庶爭餌之百疾皆愈

藥性中和可常服大畧補虛益血治風氣亦可名草還丹

細辛

本草經細辛味辛溫主欬逆頭痛腦動百節拘攣風濕痺痛死肌久服明目利九竅輕身長年一名小辛

別錄無毒主溫中下氣破痰利水道開胸中滯結除喉痺齟鼻風癩癩疾下乳結汗不出血不行安五臟益肝膽通精氣生華陰山谷二月八月採根陰乾陶隱居云今用東陽臨海者形段乃好而辛烈不及華陰高麗者用之去其頭節人患口臭者含之多效最能除痰明目

圖經細辛生華山山谷今處處有之然它處所出者不及華州

者眞其根細而其味極辛故名之曰細辛二月八月採根陰乾用今人多以杜蘅當之杜蘅吐人用時須細辯耳杜蘅春初於宿根上生苗葉似馬蹄形狀高二三寸莖如麥藁麤細每窠上有五七葉或八九葉別無枝蔓又於葉莖間罅內蘆頭上帖地生紫花其花似見不見闇結實如豆大窠內有碎子似天仙子苗葉俱青經霜卽枯其根或空有似餅葹密闇細長四五寸微黃白色味辛江淮俗呼爲馬蹄香今人多誤用故此詳述之

夢溪筆談東方南方所用細辛皆杜蘅也又謂之馬蹄香也黃白拳局而脆乾則作團非細辛也細辛出華山極細而直深紫

色味極辛嚼之習習如椒其辛更甚於椒故本草云細辛水漬令直是以杜衡僞爲之也襄漢間又有一種細辛極細而直色黃白乃是鬼督郵非細辛也

本草綱目李時珍曰博物志言杜衡亂細辛自古已然矣沈氏所說甚詳大抵能亂細辛者不止杜衡皆當以根苗色味細辯之葉似小葵柔莖細根直而色紫味極辛者細辛也葉似馬蹄莖微粗根曲而黃白色味亦辛者杜衡也一莖直上莖端生葉如繖根似細辛微粗直而黃白色味辛微苦者鬼督郵也似鬼督郵而色黑者及已也葉似小桑根似細辛微粗長而黃色味

辛而有臊氣者徐長卿也葉似柳而根似細辛粗長黃白色而味苦者白微也似白微而白直味甘者白前也

廣雅疏證細條少辛細辛也管子地員篇云其山之淺羣藥安生小辛大蒙小辛卽少辛中山經云浮戲之山東有虵谷上多少辛郭注云少辛細辛也經又云虵山其草多嘉榮少辛神農本草云細辛味辛溫一名小辛生華陰御覽引范子計然云細辛出華陰色白者善又引吳普本草云細辛如葵葉赤黑一棍一葉相連蘇頌圖經云其棍細而味極辛故名之曰細辛今人多以杜蘅當之蓋二物相似故博物志云杜蘅亂細辛也

柴胡

本草經芘胡味苦平主心腹去腸胃中結氣飲食積聚寒熱邪氣推陳致新久服輕身明日益精一名地薰

別錄爲君微寒無毒除傷寒心下煩熱諸痰熱結實胸中邪逆五臟間遊氣大腸停積水脹及濕痺拘攣亦可作浴湯一名山菜一名茹草葉一名芸蒿辛香可食生宏農川谷及冤句二月八月採根暴乾陶隱居云今出近道狀如前胡而強博物志云芸蒿葉似邪蒿春秋有白蕩長四五寸香美可食長安及河內並有之此芘胡療傷寒第一

唐本草註云芘是古柴字上林賦云芘薑及爾雅云藐芘草並作芘字且此草根紫色今太常用芘胡是也又以木代系相承呼爲芘胡且檢諸本草無名此者傷寒大小柴胡湯最爲痰氣之要若以芸蒿爲之更作茨音大謬矣

圖經柴胡生宏農山谷及宛句今關陝江湖間近道皆有之以銀州者爲勝二月生苗甚香莖青紫葉似竹葉稍緊亦有似斜蒿亦有似麥門冬而短者七月開黃花生丹州結青子與他處者不類根赤色似前胡而強蘆頭有赤毛如鼠尾獨窠長者好二月八月採根暴乾張仲景治傷寒有大小柴胡及柴胡加龍

骨柴胡加芒硝等湯故後人治傷寒此爲最要之藥

雷斅炮炙論凡使莖長軟皮赤黃髭鬚出在平州平縣卽今銀州銀縣也西畔生處多有白鶴綠鶴於此翔處是柴胡香直上雲間若有過往聞者皆氣爽凡採得後去髭并頭用銀刀削去赤薄皮少許卻以麤布拭了細剉用之勿令犯火立便無効也本草衍義苳胡本經並無一字治勞令人治勞方中鮮有不用者嗚呼凡此誤世甚多嘗原病勞有一種真藏虛損復受邪熱邪因虛而致勞故曰勞者牢也當須斟酌用之如經驗方中治勞熱青蒿煎丸用苳胡正合宜耳服之無不效熱去卽須急已

本草全圖卷之
若或無熱得此愈甚雖至死人亦不怨目擊甚多日華子又謂
補五勞七傷藥性論亦謂治勞乏羸瘦若此等病苟無實熱醫
者執而用之不死何待註釋本草一字亦不可忽蓋萬世之後
所誤無窮耳苟有明哲之士自可處治中下之學不肯考究枉
致淪沒可不謹哉可不戒哉如張仲景治寒熱往來如瘧狀用
柴胡湯正合其宜

救荒本草柴胡今鈞州密縣山谷間有之苗甚辛香莖青紫堅
硬微有細線楞葉似竹葉而小開小黃花根淡赤色採苗葉燂
熟換水淘去苦味油鹽調食

本草綱目李時珍曰銀州卽今延安府神木縣五原城是其廢蹟所產柴胡長尺餘而微白且軟不易得也北地所產者亦如前胡而軟今人謂之北柴胡是也入藥亦良南土所產者不似前胡正如蒿根強硬不堪使用其苗有如韭葉者竹葉者以竹葉者爲勝其如邪蒿者最下也按夏小正月令云仲春芸始生倉頡解詁云芸蒿也似邪蒿可食亦柴胡之類入藥不甚良蘇恭以爲非柴胡云近時有一種根似桔梗沙參白色而大市人以僞充銀柴胡殊無氣味不可不辨

植物名實圖考

三

黃連

本草經黃連味苦寒主熱氣目痛背傷泣出明目腸澼腹痛下痢婦人陰中腫痛久服令人不忘一名王連

別錄微寒無毒主五臟冷熱久下洩澼膿血止消渴大驚除水利骨調胃厚腸益膽療口瘡生巫陽川谷及蜀郡太山二月八月採陶隱居云巫陽在建平今西間者色淺而虛不及東陽新安諸縣最勝臨海諸縣者不佳用之當布裏拔去毛令如連珠俗方多療下利及渴道方服食長生

唐本草註云蜀道者麓大節平味極濃苦療渴爲最江東者節

木名實圖示
如連珠療痢大善今澧州者更勝

圖經黃連生巫陽川谷及蜀郡泰山今江湖荆夔州郡亦有而
以宣城者爲勝施黔者次之苗高一尺已來葉似甘菊四月開
花黃色六月結實似芹子色亦黃二月八月採根用生江左者
根若連珠其苗經冬不凋葉如小雉尾草正月開花作細穗淡
白微黃色六七月根緊始堪採古方以黃連爲治痢之最胡洽
方載九蓋湯主下痢不問冷熱赤白穀滯休息久下悉主之以
黃連長三寸三十枚秤重一兩半龍骨如棊子四枚重四分附
子大者一枚乾薑一兩半膠二兩半並切先以水五合著銅器

中去火三寸煎沸便下著坐土上沸止又上水五合如此九上
九下內諸藥著火上沸輒下著土上沸止又復九上九下度可
得一升頓服卽止又香連丸亦主下痢近世盛行其法以宣連
青木香分兩停同搗篩白蜜丸如梧子空腹飲下二三十丸口
再如神其久冷人卽煨熟大蒜作丸此方本出李絳兵部手集
方嬰孺用之亦效又治目方用黃連多矣而羊肝丸尤奇異取
黃連末一大兩白羊子肝一具去膜用於砂盆內研令極細衆
手撚爲丸如梧子每食以煖漿水吞三七枚連作五劑差但是
諸眼目疾及障翳青盲皆主之禁食豬肉及冷水劉禹錫云有

崔承元者因官治一死罪囚出活之囚後數年以病自致死一
旦崔爲內障所苦喪明逾年後半夜歎息獨坐時聞階除間悉
窅之聲崔問爲誰曰是昔所蒙活者囚今故報恩至此遂以此
方告訖而沒崔依此合服不數月眼復明因傳此方於世又今
醫家洗眼湯以當歸芍藥黃連等分停細切以雪水或甜水煎
濃汁乘熱洗冷卽再溫洗甚益眼目但是風毒赤目花翳等皆
可用之其說云凡眼目之疾皆以血脉凝滯使然故以行血藥
合黃連治之血得熱卽行故乘熱洗之用者無不神効

本草綱目李時珍曰黃連漢末李當之本草惟取蜀郡黃肥而

堅者爲善唐時以澧州者爲勝今雖吳蜀皆有惟以雅州眉州者爲良藥物之與廢不同如此大抵有二種一種根粗無毛有珠如鷹雞爪形而堅實色深黃一種無珠多毛而中虛黃色稍淡各有所宜

志林姚歡年八十餘以安南軍功遷雄略指揮使老於黃州鬚髮不白自言年六十歲患癬疥周匝頂踵或教服黃連遂愈久服故髮不白其法以黃連去須酒浸一宿焙乾爲末蜜圓如梧桐子大空心日午臨卧酒吞二十粒

宋秦觀與喬希聖論黃連書某比聞公以眼疾餌黃連至數十

兩猶不已不知果然否審如所聞殆不可也某頃年血氣未定頗好方術之說讀醫經數年嘗記釋者云服黃連苦參久而反熱甚以爲不然後乃信之蓋五味入胃各歸其所喜故酸先歸肝苦先歸心甘先歸脾辛先歸肺鹹先歸腎入肝則爲溫入心則爲熱入肺則爲清入腎則爲寒入脾則爲至陰而血氣兼之皆謂增其氣不已則臟氣有所偏勝有所偏勝則必有所偏絕黃連苦參性雖大寒然其味至苦入胃則先歸於心久而不已則心火之氣勝火勝則熱乃其理也眼疾之生本於肝之熱肝與心爲子母夫心爲子肝爲母心火也肝亦火也腎孤臟也人

嘗患一水不勝二火今病本於肝而久餌苦藥使心有所偏勝是所謂以火救火命之曰益多其不可亦明矣夫藥所以療疾其過也適所以爲疾聞比初作時十已損其七八正宜節藥慎護飲食以俟其自平非如決疣潰癰可以忽然一朝去也輒具以進惟留意而聽之無忽

宋史地理志施州貢黃連

峨眉縣志物產黃連產於山岩人所罕到之處採者必以藤繫腰懸於岩上自爲升降以採覓之然亦不能多得

和物名實圖考

三

胡黃連附

嘉祐本草胡黃連味苦平無毒主久痢成疳傷寒欬温瘧骨熱理腰腎去陰汗小兒驚癇寒熱不下食霍亂下痢生胡國似乾楊柳心黑外黃一名割孤露澤

圖經胡黃連生胡國今南海及秦隴間亦有之初生似蘆乾似楊柳枯枝心黑外黃不拘時月收採今小兒藥中多用之又治傷寒勞復身熱大小便赤如血色者胡黃連一兩山梔子二兩去皮入蜜半兩拌和炒令微焦二味搗羅爲末用豬膽汁和丸如梧桐子大每服用生薑二片烏梅一箇童子小便三合浸半

木牛名實目云
日去滓食後煖小便令溫下十九臨卧再服甚效

防葵

本草經防葵味辛寒主疝瘕腸洩膀胱熱結溺不下欬逆溫瘧癰癩驚邪狂走久服堅骨髓益氣輕身一名梨蓋

別錄甘苦無毒療五臟虛氣小腹支滿臏脹口乾除腎邪強志中火者不可服令人恍惚見鬼一名防慈一名爵離一名農果一名利茹一名方蓋生臨淄川谷及嵩高泰山少室三月三日採根暴乾陶隱居云北信斷今用建平間者云本與狼毒同根猶如三建今其形亦相似但置水中不沉爾而狼毒陳久亦不沉矣

唐本草註云此藥上品無毒久服主邪氣驚狂之惡其莖葉似
葵花子根香味似防風故名防葵採依時者亦能沉水乃今用
枯朽狼毒當之極爲謬矣此物亦稀有襄陽望楚山東及興州
西方有之其興州採得乃勝南者爲隣蜀土也

圖經防葵生臨淄川谷及嵩高少室泰山蘇恭云襄陽望楚山
東及興州西方有之其興州採得乃勝南者爲隣蜀土也今惟
出襄陽諸郡不聞有之其葉似葵每莖三葉一本十數莖中發
一莖其端開花如蔥花景天輩而色白根似防風香味亦如之
三月三日採六月開花結實採根爲藥

本草拾遺按此二物一是上品而陶云防葵與狼毒同根但置水中不沉爾然此二物善惡不同形質又別陶旣爲此說後人因而用之防葵將以破堅積爲下品之物與狼毒同功今古因循遂無甄別此殊誤也

防葵

山草卷之六

植物名實圖考

三

黃芩

本草經黃芩味苦平主諸熱黃疸腸澼洩痢逐水下血閉惡瘡
疸蝕火瘍一名腐腸

別錄大寒無毒療痰熱胃中熱小腹絞痛消穀利小腸女子血
閉淋露下血小兒腹痛一名空腸一名內虛一名黃文一名經
芩一名如婦其子主腸澼膿血生稭歸川谷及冤句三月三日
採根陰乾得厚樸黃連止腹痛得五味子牡蒙牡蠣令人有子
得黃耆白斂赤小豆療鼠瘻陶隱居云稭歸屬建平郡今第一
出彭城鬱州亦有之圓者名子芩爲勝破者名宿芩其腹中皆

爛故名腐腸惟取深色堅實者爲好俗方多用道家不須

圖經黃芩生秭歸山谷及冤句今川蜀河東陝西近郡皆有之
苗長尺餘莖幹麤如筋葉從地四面作叢生類紫草高一尺許
亦有獨莖者葉細長青色兩兩相對六月開紫花根黃如知母
麤細長四五寸二月八月採根暴乾用之吳普本草云黃芩又
名印頭一名內虛二月生赤黃葉兩兩四四相值其莖空中或
方圓高三四尺花紫紅赤五月實黑根黃二月九月採與今所
有小異張仲景治傷寒心下痞滿瀉心湯四方皆用黃芩以其
主諸熱利小腸故也又太陽病下之利不止有葛根黃芩黃連

湯及主始媿安胎散亦多用黃芩今醫家嘗用有效者因著之
說文解字注荃黃荃也本草經廣雅皆作黃芩今藥中黃芩也
从艸金聲巨今切七部芩艸也小雅呦呦鹿鳴食野之芩傳曰
芩艸也陸璣云芩艸莖如釵股葉如竹蔓生澤中下地鹹處爲
艸真實牛馬皆喜食之按如陸說則非黃芩藥也許君黃荃字
從金聲詩野芩字從今聲截然分別他書亂之非也毛詩音義
引說文云蒿也以別於毛公之艸也甚爲可據但訓蒿則與第
二章不別且說文當以芩與蒿篆類廁恐是一本作蒿屬釋文
也字或屬字之誤又按集韻類篇皆曰吟巖芩三字同魚音切

菜名似蒜生水中攷字林齊民要術皆云嗒似蒜生水中此則別是一物从艸今聲巨今切七部詩曰食野之芩

白薇

本草經白薇味苦平主暴中風身熱肢滿忽忽不知人狂惑邪氣寒熱酸疼溫瘧洗洗發作有時

別錄鹹大寒無毒主療傷中淋露下水氣利陰氣益精一名白幕一名薇草一名春草一名骨美久服利人生平原川谷三月三日採根陰乾陶隱居云近道處處有根狀似牛膝而短小爾方家用多療驚邪風狂疰病

圖經白薇生平原川谷今陝西諸郡及滌舒潤遼州亦有之莖葉俱青頗類柳葉六七月開紅花八月結實根黃白色類牛膝

而短小三月三日採根陰乾用今云八月採

救荒本草白微今鈞州密縣山野中有之苗高一二尺莖葉俱青頗類柳葉而闊短又似女婁腳葉而長硬毛澀開花紅色又云紫花結角似地稍爪而大中有白瓢根狀如牛膝根而短黃白色味苦鹹採嫩葉燂熟水淘淨油鹽調食並取嫩角燂熟亦可食

桔梗

本草經桔梗味辛微溫主胸脇痛如刀刺腹滿腸鳴幽幽驚恐
悸氣

別錄苦有小毒利五臟腸胃補血氣除寒熱風痺溫中消穀療
喉咽痛下蠱毒一名利如一名房圖一名白藥一名梗草一名
薺茺生嵩高山谷及冤句二八月採根暴乾節皮爲之使得壯
蠅遠志療毒怒得消石石膏療傷寒畏白及豬肉龍膽陶隱居
云近道處處有葉名隱忍二三月生可煮食之桔梗療蠱毒甚
驗俗方用此乃名薺茺今別有薺茺能解藥毒所謂亂人參者

便是非此桔梗而葉甚相似但薺芫葉下光明滑澤無毛爲異
葉生又不如人參相對者爾

唐本草注云人參苗似五加闊短莖圓有三四極極頭有五葉
簡引薺芫亂人參謬矣且薺芫桔梗又有葉差互者亦有葉三
四對者皆一莖直上葉旣相亂惟以根有心爲別爾

圖經曰桔梗生嵩高山谷及窵甸今在處有之根如小指大黃
白色春生苗莖高尺餘葉似杏葉而長橢四葉相對而生嫩時
亦可煮食之夏開花紫碧色頗似牽牛子花秋後結子八月採
根細剉暴乾用葉名隱忍其根有心無心者乃薺芫也而薺芫

亦能解毒二物頗相亂但薺苳葉下光澤無毛爲異關中桔梗
根黃頗似蜀葵根莖細青色葉小青色似菊花葉古方亦單用
之古今錄驗療卒中蠱下血如雞肝者晝夜出血石餘四藏皆
損惟心未毀或鼻破猝死者取桔梗搗屑以酒服方寸七日三
不能下藥以物拗口開灌之心中當煩須臾自定服七日止常
食猪肝臙以補之神良集驗方療胸中滿而振寒脈數咽燥不
渴時時出濁唾腥臭久久吐膿如粳米粥是肺癰治之以桔梗
甘草各二兩炙以水三升煮取一升分再服朝暮吐膿血則差
雷公炮炙論凡使勿用木梗真似桔梗咬之只是腥澀不堪凡

使去頭上尖硬二三分已來并兩畔附枝子於槐砧上細剉用
百合水浸一伏時漉出緩火熬令乾用

千金方治喉閉并毒氣桔梗二兩水三升煎取一升頓服

又方鼻衄方桔梗爲末水服方寸七日四五亦止吐下血

百一方若被打擊瘀血在腹內久不消時發動者取桔梗末熟
水下刀圭

經驗後方治骨膈風牙痛腫桔梗爲末棗穰和丸如皂子大綿
裹咬之腫則荆芥湯漱之

救荒本草桔梗今鈞州密縣山野有之根如手指大黃白色春

生苗莖高尺餘葉似杏葉而長每四葉相對而生嫩時亦可煮食開花紫碧色頗似牽牛花秋後結子葉名隱忍其根有心無心者乃薺芘也採葉燂熟換水浸去苦味淘淨油鹽調食

戰國策淳于髡一日而見七人於宣王王曰子來寡人聞之千里而一士是比肩而立百世而一聖若隨踵而至也今子一朝而見七士則士不亦衆乎淳于髡曰不然夫鳥同翼者而聚居獸同足者而俱行今求柴胡桔梗於沮澤則累世不得一焉及之鞞黍梁父之陰則剗車而載耳夫物各有疇今髡賢者之疇也王求士於髡若挹水於河而取火於燧也髡將復見之豈特

七士也

搜神記鄱陽趙壽有犬蠱時陳岑詣壽忽有大黃犬六七羣出吠岑後余相伯歸與壽婦食吐血幾死乃屑桔梗以飲之而愈爾雅正義蒟隱葱註似蘇有毛今江東呼爲隱葱藏以爲菹亦可淪食也正義蒟一名隱葱管子地員篇云其種忍蘆名可互稱也陶註本草云桔梗葉名隱葱可煮食註似蘇至食也正義郭所說與陶宏景畧同是桔梗葉也類篇云隱葱菜名似蘇未審何據

說文解字注桔梗

遑

藥名本艸經曰桔梗味辛微溫主胸脅

痛如刀刺腹滿腸鳴幽幽驚恐悸氣戰國策曰今求柴胡桔梗
於沮澤則絜世不得一焉從木桔梗艸類本艸經在艸部而字
從木者艸亦木也吉聲古肩切十二部一曰直木鄭有桔杖之
門蓋取直木爲門限之義釋宮曰杖謂之闕

白鮮

本草經味苦寒主頭風黃疸欬逆淋瀝女子陰中腫痛濕痺死肌不可屈伸起止行步

別錄鹹無毒療四肢不安時行腹中大熱飲水欲走大呼小兒驚癇婦人產後餘痛生上谷川谷及窰句四月五月採根陰乾陶隱居云近道處處有以蜀中者爲良俗呼爲白羊鮮音氣息正似羊羶或名白羶

圖經白鮮生上谷川谷及窰句今河中江寧府滁州潤州亦有之苗高尺餘莖青葉稍白如槐亦似茱萸四月開花淡紫色似

小蜀葵根似蔓青皮黃白而心實四月五月採根陰乾用又云
宜二月採差晚則虛惡也其氣息都似羊羶故俗呼爲白羊鮮
又名地羊羶又名金雀兒椒其苗山人以爲菜茹葛洪治鼠瘻
已有口濃血出者白鮮皮煮汁服一升當吐鼠子乃愈兵部手
集方療肺嗽有白鮮皮湯方甚妙

知母

本草經味苦寒主消渴熱中除邪氣肢體浮腫下水補不足益氣一名蚘母一名蓮母一名野蓼一名地參一名水參一名水凌一名貨母一名蜚母

爾雅蓐沈藩註生山上葉如韭一曰蜚母

別錄無毒療傷寒久瘧煩熱脅下邪氣隔中惡心及風汗內疸多服令人洩一名女雷一名女里一名兒草一名鹿列一名韭逢一名兒踵草一名東根一名水須一名沈燔一名蓐生河內川谷二月八月採根暴乾陶隱居云今出彭城形似菖蒲而柔

潤葉至難死掘出隨生須枯燥乃止甚療熱結亦主瘧熱煩也
范子云提母出三輔黃白者善

圖經知母生河內川谷今瀕河諸郡及解州滁州亦有之根黃
色似菖蒲而柔潤葉至難死掘出隨生須燥乃止四月開青花
如韭花八月結實二月八月採根暴乾用爾雅謂之薺又謂之
莖藩是也肘後方用此一物治溪毒大勝其法連根葉搗作散
服之亦可投水搗絞汁飲一二升夏月出行多取此屑自隨欲
入水先取少許投水上流便無畏兼辟射工亦可和水作湯浴
之甚佳

說文解字注蕇菀蕃也今本篆文無彡誤菀當是本作宄俗加艸本艸作沈直林切蕃說爾雅者謂卽今之知母从艸尋聲尋各本作尋誤徒南切古音在七部蕇蕇或从彡

又芪芪母也三字一句按前已有蕇不與芪字爲伍則說爾雅者謂蕇卽芪母非許意也从艸氏聲常支切十六部一名蜚母一名知母一名蜚母皆同部同音

貝母

本草經味辛平主傷寒煩熱淋瀝邪氣疝瘕喉痺乳癰金瘡風
瘕一名空草

爾雅苘貝母註根如小貝圓而白華葉似韭

詩經言采其蠹陸璣疏蠹今藥草貝母也其葉如栝樓而細小
其子在根下如芋子正白四方相連累相著有分解也

別錄苦微寒無毒療腹中結實心下滿洗洗惡風寒目眩項直
欬嗽上氣止煩熱渴出汗安五臟利骨髓一名藥實一名苦花
一名苦菜一名商草一名勤母生晉地十月採根暴乾陶隱居

云今出近道形似聚貝子故名貝母斷穀服之不飢

唐本草註云此葉似大蒜四月蒜熟時採良若十月苗枯根亦不佳也出潤州荊州襄州者最佳江南諸州亦有味甘苦不辛圖經貝母生晉地今河中江陵府郢壽隨鄭蔡潤滁州皆有之根有瓣子黃白色如聚貝子故名貝母二月生苗莖細青色葉亦青似蕎麥葉隨苗出七月開花碧綠色形如鼓子花八月採根曬乾此有數種鄘詩言采其蔕陸璣疏云貝母也其葉如栝樓而細小其子在根下如芋子正白四方連累相著有分解今近道出者正類此郭璞註爾雅云白花葉似韭此種罕復見之

此藥亦治惡瘡唐人記其事云江左嘗有商人左膊上有瘡如人面亦無他苦商人戲滴酒口中其面亦赤色以物食之亦能食食多則覺臍肉肉脹起或不食之則一臂痺有善醫者教其歷試諸藥金石草木之類悉試之無苦至貝母其瘡乃聚眉閉口商人喜曰此藥可治也因以小葦筒毀其口灌之數日成痂遂愈然不知何疾也謹按本經主金瘡此豈金瘡之類歟

雷斅炮炙論凡使先於柳木灰中炮令黃擘破去內口鼻上有米許大者心一小顆後拌糯米於鏃上同炒待米黃熟然後去米取出其中有獨顆團不作兩片無皺者號曰丹龍精不入藥

用若誤服令人筋脈永不收用黃精小藍汁合服立愈

說文解字注菡貝母也詩言采其蟲毛傳曰蟲貝母釋艸說文作萑萑正字蟲假借字也根下子如聚小貝韻會引作貝母艸療蛇毒六字从艸朙省聲武庚切古音在十部不曰固聲而曰省聲者取皆讀如茫也

元參

本經元參味苦微寒主腹中寒熱積聚女子產乳餘疾補腎氣
令人明目一名重臺

別錄鹹無毒主暴中風傷寒身熱支滿狂邪忽忽不知人溫瘧
酒洒血瘕下寒血除胸中氣下水止煩渴散頸下核癰腫心腹
痛堅癥定五臟久服補虛令人明目強陰益精一名元臺一名
鹿腸一名正馬一名咸一名端生河間川谷及宛句三月四月
採根暴乾陶隱居云今出近道處處有莖似人參而長大根甚
黑亦微香道家時用亦以合香

唐本草注元參根苗並臭莖亦不似人參陶云道家亦有合香
未見其理也

開寶本草詳此草莖方大高四五尺紫赤色而有細毛葉如掌
大而尖長根生青白乾卽紫黑新者潤膩合香用之俗呼爲馥
草酒漬飲之療諸毒鼠癩陶云似人參莖唐本注言根苗並臭
蓋未深識爾

圖經元參生河間及宛句今處處有之二月生苗葉似脂麻又
如槐柳細莖青紫色七月開花青碧色八月結子黑色亦有白
花莖方大紫赤色而有細毛有節若竹者高五六尺葉如掌大

而尖長如鋸齒其根尖長生青白乾卽紫黑新者潤膩一根可生五七葉三月八月九月採暴乾或云蒸過日乾陶隱居云道家時用合香今人有傳其法以元參甘松香各杵末均秤分兩盛以大酒甌中投白蜜漬令甌七八分緊封繫頭安釜中煮不住火一伏時止火候冷破甌取出再擣熟如乾更用熟蜜和甌器盛罨埋地中旋取使入樟腦搜亦可以熏衣

經驗方治患勞人燒香法用元參一斤甘松六兩爲末煉蜜一斤和勻入甌瓶內封閉地中埋甌十日取出更用炭末六兩更煉蜜六兩和令勻入瓶內封更甌五日取出燒令其鼻中常聞

其香疾自愈

珍珠囊元參乃樞機之劑管領諸氣上下清肅而不濁風藥中多用之故活人書治傷寒陽毒汗下後毒不散及心下懊懣煩不得眠心神顛倒欲絕者俱用元參以此論之治胸中氤氲之氣無根之火當以元參爲聖劑也

紫草

本草經味苦寒主心腹邪氣五疢補中益氣利九竅通水道一名紫丹一名紫芙

爾雅藐苾草注可以染絳一名苾戾廣雅云

別錄無毒療腹腫脹滿痛以合膏療小兒瘡及面皴生碭山山谷及楚地三月採根陰乾陶隱居云今出襄陽多從南陽新野來彼人種之卽是今染紫者方藥家都不復用博物志云平氏陽山紫草特好魏國以染色殊黑比年東山亦種色小淺於此者

木名各書之
圖經紫草生碭山山谷及楚地今處處有之人家園圃中或種
蒔其根所以染紫也爾雅謂之蕤廣雅謂之苾蓐苗似蘭香莖
赤節青二月有花紫白色秋實白三月採根陰乾古方稀見使
今醫家多用治傷寒時疾瘡癩不出者以此作藥使其發出韋
宙獨行方治豌豆瘡煮紫草湯飲後人相承用之其效尤速

湖南通志紫草圖經云生楚地獠人以社前者爲佳名雅銜草
務本新書曰種訖拖瓶擺之或以輕錘碾過秋深子熟旁去其
土連根取出就地鋪穢頗乾輕振其土以茅策束切去虛梢以
之染紫其色殊美

齊民要術曰種紫草宜黃白軟良之地青沙地亦善開荒黍稷

下大佳性不耐水必須高田秋耕地至春又轉耕之三月種之

耨耩地逐壟手下子

良田一畝用子二升薄田用子三升

下訖勞之鋤如穀法唯

淨爲佳其壟底草則拔之

壟底用鋤則傷紫草

九月中子熟刈之候稔

芳蒲

反燥載聚打取子

濕載子則鬱浥

卽深細耕

不細不深則失草矣

尋壟以耙耨取

整理

收草宜併手力速竟爲良遭雨則損草也

一扼隨以茅結之

擘葛彌善

四扼爲一頭

當日則斬齊顛倒十重許爲長行置堅平之地以板石鎮之令

扁濕鎮直而長燥鎮則碎折不鎮賣難售也

兩三宿豎頭著日中曝之令浥浥然

不曝

則鬱黑太燥則碎折

五十頭作一洪

洪十字大頭向外以葛纏絡

著敞屋下陰涼處棚

棧上其棚下勿使驢馬糞及人溺又忌煙皆令草失色其利勝
藍若欲久停者入五月內著屋中閉戶塞向密泥勿使風入漏
氣過立秋然後開草出色不異若經夏在棚棧上草便變黑不
復任用

爾雅翼釋草云藐苾草郭氏曰可以染紫一名苾萸說文亦曰
苾藐紫草蓋苾卽紫也以其可染紫故名苾上林賦有苾薑司
馬彪亦云紫色之薑則苾之與紫古字通用爾列仙傳商客能
致紫草賣與染家本草說云其利勝藍按種藍一畝已敵穀田
一頃矣而如復勝焉有以見後世末作之盛夫紫間色奪朱者

也韓子曰齊威公好服紫一國盡服紫五素不得一紫公患之
用管仲言謂左右曰吾惡紫臭三日境內莫有衣紫蘇代遺燕
王書曰齊紫敗素也而價十倍然則由春秋戰國以來重之矣
漢相國丞相皆秦官金印紫綬高帝相國綠綬徐廣曰金印綠
綬綬草名也以染似綠又云似紫紫綬名綯綬音瓜其色青
紫綬與藍同公加殊禮特服之何承天云綯音媯青紫色綬綬
紫色也字說曰綬紫也綬以萹染故系在左紫或染或不故系
在下綬人染也其爲此也有旻焉或不則無旻也此而已萹可
染紫謂之苾萹則苾言本紫萹言所染旻彼而此者也

博物志平氏山之陽紫草特好其他者色淺

廣志隴西紫草紫之上者

廣雅疏證苾萇苾草也苾與紫同說文云萇艸也可以染留黃
其染綠者謂之綠萇染紫者謂之紫萇前釋器云綠緌紫緌綵
也續漢書輿服志注引徐廣云緌草名也以染似綠又云似紫
則染草之萇本有綠紫二色萇與蠶通漢書百官公卿表金璽
蠶綬晉灼注云蠶草名出琅邪平昌縣似艾可染綠因以爲綬
名此綠萇也史記司馬相如傳攢戾莎徐廣注云草可染紫此
紫萇也萇通作苧周官掌染草鄭注云染草茅蒐橐蘆豕首紫

芻之屬疏云紫芻卽紫萇也爾雅云藐芻草郭注云可以染紫
一名芻萇見廣雅西山經云勞山多芻草

說文解字注芻芻草也三字句芻字僅得免刪可以證蔽下必
云蔽艸也藹下必云藹艸也皆淺人刪之周禮注云染艸茅蒐
橐盧豕首紫芻之屬按紫芻卽紫萇也紫萇卽芻草也廣雅云
芻萇芻草也古列戾同音芻紫同音本艸經云紫草一名紫丹
一名紫芙蓉陶隱居云卽是今染紫者說文云萇艸可以染留黃
謂之紫萇者以染紫之萇別於染留黃之萇也西山經曰勞山
多芻艸司馬彪注上林賦曰芻薑紫色之薑郭注南山經曰芻

羸紫色羸故知古紫苳通用从艸此聲將此切古音在十五部
轉入十六部藐苳艸也見釋艸从艸藐聲莫覺切古音在二部
古多借用爲眇字如說大人則藐之及凡言藐藐者皆是

紫參

本草經紫參味苦辛寒主心腹積聚寒熱邪氣通九竅利大小便一名牡蒙

別錄微寒無毒主療腸胃大熱唾血衄血腸中聚血癰腫諸瘡止渴益精一名衆戎一名童腸一名馬行生河西及窻甸山谷三月採根火炙使紫色陶隱居云今方家皆呼爲牡蒙用之亦少

唐本草註云紫參葉似羊蹄紫花青穗皮紫黑肉紅白肉淺皮深所在有之牡蒙葉似及已而大根長尺餘皮肉亦紫色根苗

本草名實圖
並不相同雖一名牡蒙乃王孫也紫參京下見用者是出蒲州也

圖經紫參生河西及窻旬山谷今河中解晉齊及淮蜀州郡皆有之苗長一二尺根淡紫色如地黃狀莖青而細葉亦青似槐葉亦有似羊蹄者五月開花白色似葱花亦有紅紫而似水菘者根皮紫黑肉紅白色肉淺而皮深三月採根火炙令紫色又云六月採曬乾用張仲景治痢紫參湯主之紫參半斤甘草二兩以水五升煎紫參取二升內甘草煎取半升分溫三服錢起紫參歌序紫參幽芳也五葩連萼狀飛禽羽舉俗名之五

鳥花起故山道人蘭若尤豐此藥校書劉公詠歌之俾予繼組

本草綱目卷之六

紫參

秦艽

本草經秦艽味苦平主寒熱邪氣寒濕風痺肢節痛下水利小便

別錄辛微溫無毒療風無問久新通身攣急生飛鳥山谷二月八月採根暴乾陶隱居云飛鳥或是地名今出甘松龍洞蠶咬長大黃白色爲佳根皆作羅文相交中多銜土用之熟破除去方家多作秦膠字與獨活療風常用道家不須爾

唐本草注云今出涇州鄜州岐州者良本作糺或作糾作膠正作芎也

圖經秦艸生飛鳥山谷今河陝州軍多有之根土黃色而相交
糾長一尺已來麓細不等枝幹高五六寸葉婆婆連莖梗俱青
色如萵苣葉六月中開花紫色似葛花當月結子每於春秋採
根陰乾正元廣利方療黃心煩熱口乾皮肉皆黃以秦艸十二
分牛乳一大升同煮取七合去滓分溫再服差此方出於許仁
勳又崔元亮集驗方凡發背疑似者須便服秦艸牛乳煎當得
快利三五行卽差法並同此又治黃方用秦艸一大兩細剉作
兩貼子以上好酒一升每貼半斤酒絞取汁去滓空腹分兩服
或利便止就中好酒人易治凡黃有數種傷酒曰酒黃夜食誤

發鼠糞亦作黃因勞發黃多痰涕目有赤脉日益憔悴或面赤
惡心者是元亮用之及治人皆得力極效秦芎須用新好羅文
者佳

王孫

本草經王孫味苦平主五藏邪氣寒濕痺肢疼酸膝冷痛

別錄無毒主療百病益氣吳名白功草楚名王孫齊名長孫一名黃孫一名黃昏一名海孫一名蔓延生海西川谷及汝南城郭垣下陶隱居云今方家皆呼名黃昏又云牡蒙市人亦少識者

游宦紀聞後山贈二蘇公詩末云如大醫王治膏肓外證已解中尙彊探囊一試黃昏湯一洗十年新學腸任子淵注云按圖經本草曰合歡夜合也一名合昏韋宙獨行方胸中甲錯是爲

肺癰黃昏湯治之取夜合皮掌大一枚水煮服之其說最爲牽合無義沙隨先生云晚年因閱本草王孫味苦平無毒主五臟邪氣吳名白功草楚名王孫齊名長孫一名黃孫一名黃昏生海西川谷蓋指當時癖學爲五臟邪氣耳取義精深如此

唐本草注按陳延之小品方述本草牡蒙一名王孫徐之才藥對有牡蒙無王孫此則一物明矣牡蒙葉似及已而大根長尺餘皮肉皆紫色

本草拾遺旱藕生太行山中狀如藕

本草綱目李時珍曰王孫葉生顛頂似紫河車葉按神農及吳

普本草紫參一名牡蒙陶宏景亦曰今方家呼紫參爲牡蒙其
王孫並無牡蒙之名爾陶氏於王孫下乃云又名牡蒙且無形
狀唐蘇恭始以紫參牡蒙爲二物謂紫參葉似羊蹄王孫葉似
及已但古方所用牡蒙皆爲紫參後人所用牡蒙乃王孫非紫
參也不可不辨唐元宗時隱民姜撫上言終南山有旱藕餌之
延年類葛粉帝取作湯餅賜大臣右驍騎將軍甘守誠曰旱藕
者牡蒙也方家久不用撫易名以神之爾據此牡蒙乃王孫也
蓋紫參止治血證積聚瘡痢而王孫主五臟邪氣痺痛療百病
之文自可推也蘇恭引小品方牡蒙所主之證乃紫參非王孫

按王孫根如藕故江右土醫皆呼爲百節藕用猪肉煨湯食之以治虛勞與別錄主療相近其葉與三白草頗類余至廣信使人持以示賣草藥者其人曰此王孫也殆舊名尙存俗間而醫者不知也噫老農老圃非吾師也耶

淫羊藿

本草經味辛寒主陰痿絕陽莖中痛利小便益氣力强志一名剛前

別錄無毒堅筋骨消癰癰赤癰下部有瘡洗出蟲丈夫久服令人無子生上郡陽山山谷陶隱居云服此使人好爲陰陽西川北部有淫羊一口百遍合蓋食藿所致故名淫羊藿

圖經淫羊藿俗名仙靈脾生上郡陽山山谷今江東陝西泰山漢中湖湘間皆有之葉青似杏葉上有刺莖如粟稈根紫色有鬚四月開花白色亦有紫色碎小獨頭子五月採葉曬乾湖湘

出者葉如小豆枝莖緊細經冬不凋根似黃連關中俗呼三枝九葉草苗高一二尺許根葉俱堪使

救荒本草仙靈皮本草名淫羊藿一名剛前俗名黃連祖千兩金乾雞筋放杖草棄杖草俗又呼三枝九葉草今密縣山野中亦有苗高二尺許莖似小豆莖極細緊葉似杏葉頗長近蒂皆有一缺又似菜豆葉亦長而光梢間開花白色亦有紫色作碎小獨頭子根紫色有鬚形類黃連狀採嫩葉燂熟水浸去邪味淘淨油鹽調食

本草綱目李時珍曰生大山中一根數莖莖粗如線高一二尺

一莖三極一極三葉葉長二三寸如杏葉及豆藿面光背淡甚薄而細齒有微刺

狗脊

本草經味苦平主腰背強關機緩急周痺寒濕膝痛頗利老人
丁名百枝

別錄甘微溫無毒療失溺不節男子腳弱腰痛風邪淋露少氣
目闇豎脊利俛仰女子傷中關節重一名強脊一名扶蓋一名
扶筋生常山川谷二月八月採根暴乾陶隱居云今山野處處
有與菝葜相似而小異其根葉小肥其節疏其莖大直上有刺
葉圓有脈赤色根凹鳥交徒結切 凸徒結切 窳窳如羊角細強者是

圖經狗脊生常山川谷今太行山淄溫眉州亦有根黑色長三

四寸兩指許大苗尖細碎青色高一尺已來無花其莖葉似貫衆而細其根長而多歧似狗脊骨故名之其肉青綠春秋採根暴乾用今方亦用金毛者

雷斅炮炙論凡使勿用透山藤其大脰根與透山藤一般只是入頂苦不可餌也凡修事細判了酒拌蒸從巳至申出曬乾用本草綱目李時珍曰狗脊有二種一種根黑色如狗脊骨一種有金黃毛如狗形皆可入藥其莖細而葉花兩兩對生正似大蕨比貫衆葉有齒面背皆光其根大如拇指有硬黑鬚簇之吳普陶貞白所說根苗皆是菝葜蕪恭蕪頌所說卽眞狗脊也按

張揖廣雅云菝葜狗脊也張華博物志云菝葜與葶藶相亂一名狗脊觀此則昔人以菝葜爲狗脊相承之誤久矣然菝葜葶藶三者形狀雖殊而功用亦不甚相遠

地榆

本草經地榆味苦微寒主婦人乳痲痛七傷帶下病止痛除惡肉止汗療金瘡

別錄甘酸無毒主止膿血諸瘻惡瘡熱瘡消酒除消渴補絕傷產後內塞可作金瘡膏生桐柏及窠旬山谷二月八月採根暴乾陶隱居云今近道處處有葉似榆而長初生布地而花子紫黑色如鼓故名玉鼓一莖長直上根亦入釀酒道方燒作灰能爛石也乏茗時用葉作飲亦好

圖經地榆生桐柏及窠旬山谷今處處有之宿根三月內生苗

初生布地莖直高三四尺對分出葉葉似榆少狹細長作鋸齒狀青色七月開花如樅子紫黑色根外黑裡紅似柳根二月八月採暴乾葉不用山人乏茗時採此葉作飲亦好古斷下方多用之葛氏載徐平療下血二十年者取地榆鼠尾草各二兩水二升煮半頓服不斷水漬屋塵飲一小盃投之不過重作乃愈小兒疳痢亦單煮汁如飴糖與服便已又毒蛇螫人搗新根取汁飲兼以漬瘡良崔元亮海上方赤白下骨立者地榆一斤水三升煮取一升半去滓再煎如稠飴絞濾空腹服三合日再救荒本草地榆今處處有之密縣山野中亦有此多宿根其苗

初生布地後攢莖直高三四尺對分生葉葉似榆葉而狹細頗長作鋸齒狀青色閒花如樺子紫黑色採嫩葉燂熟用水浸去苦味換水淘淨油鹽調食無茶時用葉作飲甚解熱

齊民要術神仙服食經云地榆一名玉扎北方難得故尹公度曰寧得一斤地榆不用明月寶珠其實黑如鼓北方呼鼓爲扎嘗言玉鼓與五茄煮服之可神仙是以西域真人曰何以支長生食石畜金鹽何以得長壽食石用玉鼓此草霧而不濡太陽氣盛也鑠玉爛石炙其根作飲如茗氣其汁釀酒治風痺補腦廣志曰地榆可生食

東坡雜記世傳四味五兩天麻煎蓋古方本以四時加減世但傳春利耳春肝主多風故倍天麻夏伏陰故倍烏頭秋多利下故倍地榆冬伏陽故倍元參當須去皮生用治之萬搗烏頭無復毒依此常服不獨去病乃保真延年與仲景八味丸並驅矣

苦參

本草經味苦寒主心腹結氣癥瘕積聚黃疸溺有餘瀝逐水除癰腫補中明目止淚一名水槐一名苦蕒

別錄無毒養肝膽氣安五臟定志益精利九竅除伏熱腸澀止渴醒酒小便黃赤瘡惡下部匿平胃氣令人嗜食輕身一名地槐一名菟槐一名驕槐一名白莖一名虎麻一名岑莖一名綠白一名陵郎生汝南山谷及田野三月八月十月採根曝乾陶隱居云今出近道處處有葉極細似槐樹故有槐名花黃子作莢根味至苦惡病人酒漬飲之多差患疥者一兩服亦除蓋能

殺蟲

圖經苦參生汝南山谷及田野今近道處處皆有之其根黃色長五七寸許兩指籠細三五莖並生苗高三四尺已來葉碎青色極似槐葉故有水槐名春生冬凋其花黃白七月結實如小豆子河北生者無花子五月六月八月十月採根暴乾用古今方用治瘡癩最多亦可治癩疾其法用苦參五斤切以好酒三斗漬三十日每飲一合日三常服不絕若覺痺卽差取根皮末服之亦良

本草衍義苦參有朝士苦腰重久坐旅拒十餘步然後能行有

一將佐謂朝士曰見公日逐以藥措齒得無用苦參否曰始以
病齒用苦參已數年此病由苦參入齒其氣味傷腎故使人腰
重後有太常少卿舒昭亮用苦參措齒歲久亦病腰自後悉不
用腰疾皆愈此皆方書舊不載者有人病遍身風熱細癢痺痛
不可忍連胸頸臍腹及近隱皆然涎痰亦多夜不得睡以苦參
末一兩皂角二兩水一升揉濾取汁銀石器熬成膏和苦參爲
丸如梧桐子大食後溫水服二十至三十九次日便愈

史記太倉公傳太倉公者姓淳于氏名意少而喜醫方術爲人
治病決死生多驗齊中大夫病齩齒意灸其左陽明脈卽爲苦

參湯日漱三升出入慎風五六日病已

龍膽

本草經龍膽味苦澁主骨間寒熱驚癇邪氣續絕傷定五臟殺
蠱毒久服益智不忘輕身耐老一名陵游

別錄大寒無毒除胃中伏熱時氣溫熱熱洩下痢去腸中小蠱
益肝膽氣止驚惕生齊胸山谷及窵句二月八月十一月十二
月採根陰乾陶隱居云今出近道吳興爲勝狀似牛膝味甚苦
故以膽爲名

圖經龍膽生齊胸山谷及窵句今近道亦有之宿根黃白色下
抽根十餘本大類牛膝直上生苗高尺餘四月生葉而細莖如

小竹枝七月開花如牽牛花作鈴鐸形青碧色冬後結子苗便
枯二月八月十一月十二月採根陰乾俗呼爲草龍膽浙中又
有山龍膽草味苦澀取根細剉用生薑自然汁浸一宿去其性
焙乾搗水煎一錢七溫服之治四肢疼痛採無時候葉經霜雪
不凋此同類而別種也古方治疸多用之集驗方穀疸丸苦參
三兩龍膽一兩二物下篩牛膽和丸先食以麥飲服之如梧子
五丸日三不知稍增刪繁方治勞疸同用此龍膽加至二兩更
增梔子仁三七枚三物同篩搗丸以猪膽服如前法以飲下之
其說云勞疸者因勞爲名穀疸者因食而勞也

李衍竹譜龍膽草生齊胸山谷今近道亦有之根類牛膝直上
生苗高尺餘四月生葉莖細如小竹枝七月開花如牽牛
救荒本草龍膽草今鈞州新鄭山岡間有之根類牛膝而根一
本十餘莖黃白色宿根苗高尺餘葉似柳葉而細短又似小竹
開花如牽牛花青碧色似小鈴形樣採葉燂熟換水浸淘去苦
味油鹽調食勿空腹服

和物名實圖考

之

茅根

本草經味甘寒主勞傷虛羸補中益氣除瘀血閉寒熱利小便
其苗主下水一名蘭根一名茹根

別錄無毒下五淋除客熱在腸胃止渴堅筋婦人崩中久服利
人一名地菅一名地筋一名兼杜生楚地山谷田野六月採根
陶隱居云此卽今白茅菅詩云露彼菅茅其根如渣芹甜美服
食此斷穀甚良俗方稀用惟療淋及崩中爾

圖經茅根生楚地山谷田野今處處有之春生苗布地如鍼俗
間謂之茅鍼亦可噉甚益小兒夏生白花茸茸然至秋而枯其

根至潔白亦甚甘美六月採根用今人取茅鍼按以傅金瘡塞
鼻洪止暴下血及溺血者殊效劉禹錫傳信方療癰腫有頭使
必穴方取茅錐一莖正爾全煎十數沸服之立潰若兩莖卽生
兩孔或折斷一枝爲二亦生兩穴白茅花亦主金瘡止血又有
菅亦茅類也陸璣草木疏云菅似茅而滑無毛根下五寸有白
粉者柔韌宜爲索漚之尤善其未漚者名野菅詩所謂白茅菅
兮是此也入藥與茅等其屋苦茅經久者主卒吐血細剉三升
酒浸煮服一升良已

本草綱目李時珍曰茅有白茅菅茅黃茅香茅芭茅數種葉皆

相似白茅短小三四月開白花成穗結細實其根甚長白軟如筋而有節味甘俗呼絲茅可以苦蓋及供祭祀苞苴之用本經所用茅根是也其根乾之夜視有光故腐則變爲螢火菅茅只生山上似白茅而長入秋抽莖開花成穗如荻花結實尖黑長分許粘衣刺人其根短硬如細竹根無節而微甘亦可入藥功不及白茅爾雅所謂白華野菅是也黃茅似菅茅而莖上開葉莖下有白粉根頭有黃毛根亦短而細硬無節秋深開花穗如菅可爲索綯古名黃菅別錄所用菅根是也香茅一名菁茅一名瑤茅生湖南及江淮間葉有三脊其氣香芬可以包藉及縮酒

禹貢所謂荊州苞匭菁茅是也。芭茅叢生葉如大蒲長六七尺有二種卽芒也。

廣雅疏證：葑菽茅穗也。茅穗茅秀也。葑與茶同。鄭風出其東門篇有女如茶。傳云茶英茶也。言皆喪服也。箋云茶茅秀物之輕者。飛行無常。正義云言茶英茶者。六月云白旄英英是白貌。茅之秀者其穗色白。言女皆喪服色如茶然。吳語白常白旃素甲白羽之皜望之如茶。韋昭云茶茅秀亦以白色爲如茶。與此傳意同。案考工記鮑人之事望而眡之欲其茶白也。鄭注云當如茅秀之色。漢書禮樂志顏如茶。應劭注云茶野菅白華也。言此

奇麗白如茶也野菅卽茅屬說文云菅茅也是茅穗名茶義取
白色也蘇頌本草圖經云茅春生苗布地如鍼夏生白花茸茸
然卽所謂茶矣古者用茶以爲席箸夏小正云四月取茶傳云
茶也者以爲君薦蔣也士喪禮記云茵箸用茶鄭注云茶茅秀
也周官掌茶掌以時聚茶以共喪事鄭注云共喪事者以箸物
也引士喪禮記茵箸用茶皆是也說文云菘茅秀也從艸私聲
案說文云私禾也北道名禾主人曰私主人私與菘同聲當亦
是禾秀之稱後乃通名禾爲私耳私穗正一聲之轉也茅穗名
菘禾穗亦名私猶茅穗名菘禾穗亦名菘廣韻云稜穗也集韻

云禾穗曰稌或從斜作藪玉篇廣韻並云藪穗也不言茅穗則爲禾穗可知故禾穗之亦名菘可以藪定之也藪菘亦一聲之轉

說文解字注茅菅也按統言則茅菅是一析言則菅與茅殊許
菅茅互訓此從統言也陸璣曰菅似茅而滑澤無毛根下當作
上五寸中有白粉者柔韌宜爲索漚乃尤善矣此析言也从艸
矛聲莫交切古音在三部可縮酒爲藉各本無此五字依韻會
所引補縮酒見左傳爲藉見周易此與菴可以香口菴可以爲
萃席一例菅茅也詩白華菅兮釋草曰白華野菅毛傳足之曰

已漚爲菅按詩謂白華旣漚爲菅又以白茅收束之菅別於茅野菅又別於菅也从艸官聲古顏切十四部

又蔽艸也左傳引詩曰雖有絲麻無棄菅蒯李善引聲類曰蒯艸中爲索苦怪切史記馮驩有一劍蒯緱裴駘曰蒯茅之類可爲繩其劍把無物可裝以小繩纏之也从艸卮聲按說文無卮字而爾雅有之釋詁曰卮息也音義曰卮苦怪反又墟季反字林以爲喟亡壞反孫本作快郭又作嘖按卮字今不可得其左傍所從何等字之本訓何屬但其古音在十五部甚明說文聲蔽皆以爲聲而卮字亦作聾蔽字逸詩與萃匱爲韻皆在十五

部也不知何時蔽改作蒹從朋從刀殊不可曉蓋本扶風鄘鄉之字誤鄘讀若陪在第六部第六部與十五部相隔絕遠而誤其作蒹且用爲蔽字不可從也玉篇引無棄菅蔽不作蒹苦怪切

又蒹牡茅也見釋艸此當與菅茅二篆類廁而不爾者蓋其種類殊也从艸遯聲桑谷切三部遯籀文速凡速聲字皆從速則牡茅字作速可矣而小篆偶從遯與他速聲字不畫一故箸之序曰小篆取史籀大篆或頗省改蒹者大篆文應省改而不省改者也菘茅秀也廣雅曰蒹菘茅穗也蒹卽茶字之變周禮儀

禮注鄭風箋吳語注皆云茶茅秀當是茶爲茅之秀菑爲薺之
秀統言之則曰茅秀而已其色正白从艸私聲息夷切十五部

附茅彙考

禹貢包匭菁茅注菁茅有刺而三脊所以供祭祀縮酒之用既包而又匣之所以示敬也齊桓公責楚貢苞茅不入王祭不供無以縮酒又管子云江淮之間一茅而三脊名曰菁茅菁茅一物也孔氏謂菁以爲薶者非是今辰州麻陽縣苞茅山出苞茅有刺而三脊

詩東門之池可以漚菅疏釋草云白華野菅郭璞云茅屬白華箋云人刈白華於野已漚之名之爲菅然則菅者已漚之名未漚則但名爲茅也陸璣疏云菅似茅而滑澤無毛根下五寸中

有白粉者柔韌宜爲索漚乃尤善矣朱注菅葉似茅而滑澤莖有白粉柔韌宜爲索也大全濮氏曰左傳云雖有絲麻無棄菅蒯蒯與菅皆謂茗也黃華者俗名黃芒卽蒯也白華者俗名白芒卽菅也

詩白華菅兮白茅束兮傳白華野菅也已漚爲菅疏釋草云茅菅白華一名野菅郭璞曰茅屬也此白華亦是茅菅類也漚之柔韌異其名謂之爲菅因謂在野未漚者爲野菅也王肅云白茅束白華以輿夫婦之道宜以端成絜白相山東然後成室家也

周禮甸師祭祀共蕭茅注鄭大夫云蕭字或爲菁菁讀爲縮束
茅立之祭前沃其酒上酒滲下去若神飲之故謂之縮縮浚也
故齊桓公責楚不貢菁茅王祭不共無以縮酒元謂茅以共祭
之苴亦以縮酒苴以藉祭縮酒沛酒也醴齊縮酌疏蕭字鄭大
夫讀爲縮者欲以蕭茅共爲一事解之云束茅立之祭前言此
鄭大夫之意取士虞禮束茅立几束所以藉祭此義蕭茅共爲
一則不可若束茅立之祭前義得通元云茅以共祭之苴者則
士虞禮束茅長五寸立於几束謂之苴者是也云亦以縮酒者
左氏管仲辭是也此官共茅司巫云祭祀共藉館茅以爲藉兩

官共共者謂此甸師共茅與司巫司巫爲苴以共之此據祭宗廟也鄉師又云大祭祀共茅菹者謂據祭天時亦謂甸師氏送茅與鄉師爲苴以共之若然甸師氏直共茅而已不供苴耳訂義王昭禹曰易曰藉用白茅是取茅以藉酒也齊桓責楚不共包茅曰無以縮酒是取茅以縮酒也王氏曰必用茅者謂其體順理直柔而潔白承祭祀之德當如此也陸氏曰茅有貢于萬國者禹貢荊州之土貢春秋齊桓之責楚是也有共於甸師者祭祀共蕭茅是也然甸師之茅或入鄉師或入司巫鄉師之所共者大祭祀司巫之所共者凡祭祀也茅之爲用或以縮酒如

記口縮酌用茅司尊彝醴齊縮酌是也或以藉物士虞禮曰鉤袒取黍稷祭於苴鄉師共茅菹是也至男巫謂旁招以茅則又除不祥也

又鄉師之職大祭祀共茅菹注杜子春云菹當爲菹以茅爲菹若葵菹也鄭大夫讀菹爲藉謂祭前藉也易曰藉用白茅无咎元謂菹士虞禮所謂苴苴刈茅長五寸束之者是也祝設于几東席上命佐食取黍稷祭于苴三取膚祭祭如初此所以承祭既祭蓋束而去之守祧職云既祭藏其隋是與疏共茅菹者按甸師職共蕭茅彼直共茅與此鄉師鄉師得茅束而切之長五寸

立之祭前以藉祭故云茅菹也注杜子春云以茅爲菹茅草不堪食故後鄭不從鄭大夫讀菹爲藉謂祭前藉此後鄭從之又引易曰藉用白茅无咎者證菹爲藉之義元謂菹士虞禮所謂苴刈茅長五寸束之者是也引之者欲見其菹爲祭之藉此增成鄭大夫之義

又司巫掌羣巫之政令祭祀則共菹館注菹之言藉也祭食有當藉者館所以承菹謂若今筐也士虞禮曰苴刈長五寸實於筐饌於西北上又曰祝盥取苴降洗之升入設於几東席上東

縮

又男巫掌望祀望衍授號旁招以茅注旁招以茅招四方之所望祭者訂義鄭鏐曰用茅以招之神來無方其招亦非一方也故曰旁招茅之爲物柔順潔白惟潔白可以見誠敬之心惟柔順可以致懷柔之禮

爾雅薏牡茅註白茅屬疏茅之不實者也一名薏一名牡茅郭云白茅屬

毛詩陸疏廣要白茅包之茅之白者古用包裹禮物以充祭祀縮酒用爾雅云薏牡茅郭鄭俱云白茅屬邢云茅之不實者也一名薏一名牡茅周易云拔茅茹以其彙征吉陸佃云茅之爲

物拔其根而牽茹者君子以類出處之象又云藉用白茅无咎
象曰藉用白茅柔在下也孔子云茅之爲物薄而用可重也禹
貢云荊州厥貢苞匭菁茅吳錄地理志曰桂陽柳縣有青茅可
染零陵泉陵有香茅古貢之縮酒合璧事類云茅叢生荒野間
野人刈以覆屋江淮間生者一莖三脊曰菁茅

又白華菅兮菅似茅而滑澤無毛根下五寸中有白粉者柔韌
宜爲索漚乃尤善矣爾雅云白華野菅舍人云白華一名野菅
郭云茅屬此白華亦是茅之類也漚之柔韌異其名謂之爲菅
因謂在野未漚者爲野菅耳詩小雅云白華菅兮是也鄭氏云

今亦謂之菅似茅而高大孔疏曰鄭箋云人刈白華于野已漚之名之爲菅然則菅者已漚之名未漚則但名爲茅也陸農師云爾雅曰白華野菅傳曰已漚爲菅未霑人功故謂之野菅菅茅屬也而其華白故一曰白華詩序曰白華孝子之潔白也南陔孝子相戒以養也陔戒也故曰相戒以養逸詩曰雖有姬姜無棄憔悴雖有絲枲無棄菅蒯菅蒯猶所謂糟糠也范氏曰菅以爲履濮氏曰左傳云雖有絲麻無棄菅蒯蒯與菅皆謂菘也黃花者俗名黃芒卽蒯也白華者俗名白芒卽菅也異物志云香菅似茅而葉長大于茅不生滂下之地凡所烝享必得此菅

包裹助調五味按郭景純云菅茅屬而陸疏鄭註朱傳俱云似
茅確是二物下章云露彼菅茅猶逸詩云無棄菅蒯也茅乃散
材菅爲女作纖微所不棄者故東門之池與麻紵同詠也孔氏
以爲已漚爲菅未漚爲茅恐未必然惟邢氏云未漚爲野菅斯
得耳濮氏以爲茗想誤認爲菡蓩之醜矣若異物志所載香菅
又是一種想成王時會人獻以菅卽此類也

黃茅

別錄地筋味甘平無毒主益氣止渴除熱在腹臍利筋一名菅根一名土筋生澤中根有毛三月生四月實白三月三日採根陶隱居云疑此猶是白茅而小異也

本草拾遺地筋如地黃根葉並相似而細多毛生平澤功用亦同地黃李邕方用之

本草綱目李時珍曰此乃黃菅茅之根也功與白茅根相同詳見白茅下陳藏器所說別是一物非菅根也

廣雅疏證蘘茅蔽也廣韻蔽茅類蘘草名似蒲一云似茅爾雅

藟藟董郭注云似蒲而細邢昺疏云可爲屨亦可絢以爲索說
文董藟藟也杜林曰藕根徐鍇傳云似蒲而細今人以織屨西
京賦草則葳莎菅蔽李善注引聲類云蔽草中爲索玉篇同成
九左傳雖有絲麻無棄菅蔽正義云陸璣毛詩疏菅似茅滑
澤無毛筋宜爲索蔽亦菅之類喪服傳云疏屨者藟蔽之菲也
可以爲屨並可代絲麻之乏然則蔽爲索爲屨與藟同是一物
也遼釋行均龍龕手鑑云藟草一名鼎童似烏尾可食

白芨

本草經白芨味苦平主癰腫惡瘡敗疽傷陰死肌胃中邪氣賊風鬼擊痲緩不收一名甘根一名連及草

別錄辛微寒無毒除白癬疥蟲生北山川谷又宛句及越山紫石英爲之使惡理石畏李核杏仁陶隱居云近道處處有之葉似杜若根形似菱米節間有毛方用亦稀可以作糊

唐本草注云此物山野人患手足皸痲嚼以塗之有效

蜀本草注云反烏頭又圖經云葉似初生楸欄及藜蘆莖端生一臺四月生開紫花七月實熟黃黑色冬凋根似菱三角白色

本草綱目卷之六
角頭生芽今出申州二月八月採根用

圖經曰白及生北山川谷又寃句及越山今江淮河陝漢黔諸州皆有之生石山上春生苗長一尺許似栢欄及藜蘆莖端生一臺葉兩指大青色夏開紫花七月結實至熟黃黑色至冬葉凋根似菱米有三角白色角端生芽二月七月採根今醫治金瘡不差及癰疽方中多用之

經驗方治鼻衄不止甚者白及爲末津調塗山根上立止

隴蜀餘聞白芨花白色五瓣瓣中有苞白質紫點內吐黃鬚極可玩武連梓潼間山谷多有之

白芨花與今見者不類恐別是一種白射干或亦目爲白芨所載形狀頗近之

本草綱目李時珍曰韓保升所說形狀正是但一科止抽一莖開花長寸許紅紫色中心如舌其根如菱米有臍如鳧茈之臍又如扁扁螺旋紋性難乾

廣雅疏證白芨菴蕒也按白芨以根白得名也根有三角故一名菴一名蕒秦風小戎篇名予鋈錁傳云名三隅予也聲義正與仇同爾雅茨蒺藜郭注云子有三角刺人離騷茨作蕒亦與此同義也御覽引晉宮閣名云華林園白及三株倘以其莖葉

可玩而植之與

白頭翁

本草經白頭翁味苦溫無毒主溫瘧狂易寒熱癥瘕積聚瘵氣逐血止痛療金瘡一名野丈人一名胡王使者

別錄有毒主鼻衄一名奈何草生高山山谷及田野四月採陶隱居云處處有近根處有白茸狀似人白頭故以爲名方用亦療毒痢

唐本草注其葉似芍藥而大抽一莖莖頭一花紫色似木堇花實大者如雞子白毛寸餘皆披下似纛頭正似白頭老翁故名焉今言近根有白茸陶似不識太常所貯蔓生者乃是女萎其

白頭翁根甚療毒痢似續斷而扁別本注云今處處有其苗有風則靜無風而搖與赤箭獨活同也

藥性論白頭翁使味甘苦有小毒止腹痛及赤毒痢治齒痛主項下瘤癰又云胡王使者味苦有毒主百骨節痛豚實爲使

蜀本草圖經云有細毛不滑澤花藥黃今所在有之二月採花四月採實八月採根皆日乾

圖經曰白頭翁生嵩山山谷今近京州郡皆有之正月生苗作叢狀如白微而柔細稍長葉生莖端上有細白毛而不滑澤近根有白茸正似白頭老翁故名焉根紫色深如蔓菁二月三月

開紫花黃蘗五月六月結實其苗有風則靜無風而搖與赤箭
獨活同七月八月採根陰乾用今俗醫用合補下藥服之大暖
亦衝人

外臺秘要治陰癩白頭翁根生者不限多少搗之隨偏腫處以
傅之一宿當作瘡二十日愈

肘後方小兒禿取白頭翁根搗傅一宿或作瘡二十日愈

本草衍義曰白頭翁生河南洛陽界及新安土山中性溫止腹
痛暖腰膝唐本注及藥性論甚詳陶隱居失於不審宜其排叱
也新安縣界兼山野中屢嘗見之正如唐本注所說至今本處

山中人賣白頭翁丸言服之壽考不失古人命名之意

貫衆

本草經貫衆味苦微寒主腹中邪熱氣諸毒殺三蟲一名貫節
一名貫渠一名百頭一名虎卷一名扁苻

爾雅云深貫衆注葉員銳莖毛黑布地冬不死一名貫渠廣雅
云貫節

別錄有毒去寸白破癥瘕除頭風止金瘡花療惡瘡令人洩一
名伯萍一名藥藻此謂草鴟頭生立山山谷及窵句少室山二
月八月採根陰乾藿菌爲之使陶隱居云近道亦有葉如大蕨
其根形色毛芒全似老鴟頭故呼爲草鴟頭

蜀本圖經云一名藥藻又圖經云苗似狗脊狀如雉尾根直多枝皮黑肉赤曲者名草鴟頭療頭風用之今所在山谷陰處有之

圖經曰貫衆生玄山山谷及寃句少室山今陝西河東州郡及荆襄間多有之而少有花者春生苗赤葉大如蕨莖幹三稜葉綠色似小雞翎又云鳳尾草根紫黑色形如大瓜下有黑鬚毛又似老鴟三月採根曬乾荆南人取根爲末水調服一錢七止鼻血有效

本草綱目李時珍曰多生山陰近水處數根叢生一根數莖莖

大如筋其涎滑其葉兩兩對生如狗脊之葉而無鋸齒青黃色
面深背淺其根曲而有尖背黑鬚叢族亦似狗脊根而大狀如
伏鴟

又曰貫衆大治婦人血氣根汁能制三黃化五金伏鍾乳結砂
制汞且能解毒輭堅王海藏治夏月豆出不快快斑散用之云
貫衆有毒而能解腹中邪熱之毒病因內感而發之於外者多
效非古法之分經也又黃山谷煮豆輔言荒年以黑豆一升援
淨入貫衆一斤剉如骰子大同以水煮文火斟酌至豆熟取出
日乾覆令展盡餘汁簸去貫衆每日空心嚼豆五七粒能食百

草木枝葉有味可飽又王璆百一選方言滁州蔣教授因食鯉魚玉蟬羹爲肋肉所哽凡藥皆不效或令以買衆濃煎汁一盞分三服連進至夜一喀而出亦可爲末水服一錢觀此可知其輒堅之功不但治血治瘡而已也

黃精

別錄黃精味甘平無毒補中益氣除風濕安五臟久服輕身延年不飢一名重樓一名莧竹一名雞格一名救窮一名鹿竹生山谷二月採根陰乾陶隱居云今處處有二月始生一枝多葉葉狀如竹而短根似萎蕤萎蕤根如荻根及菖蒲概節而平直黃精根如鬼臼黃連大節而不平雖燥並柔軟有脂俗方無用此而爲仙經所貴根葉華實皆可餌服酒散隨宜具在斷穀方中黃精葉乃與鉤吻相似惟莖不紫花不黃爲異而人多惑之其類乃殊遂致死生之反亦爲奇事

本草註黃精肥地生者卽大如拳薄地生者猶如拇指萎蕤
肥根頗類其小者肌理形色大都相似今以黃連鬼臼爲比殊
無彷彿黃精葉似柳及龍膽徐長卿輩而堅其鈎吻蔓生殊非
比類廣雅黃精龍銜也

抱朴子黃精一名垂珠服其花勝其實實勝其根但花難得生
花十斛乾之纔可得五六斗耳而服之日可三合非大有役力
者不能辦也服黃精僅十年乃可大得其益耳且以斷穀不及
朮朮餌令人肥健可以負重陟險但不及黃精味美易食凶年
之時可以與老小代糧人食之謂爲米脯也

博物志昔黃帝問天老曰天地所生豈有食之令人不死乎天老曰太陽之草曰黃精餌之可以長生太陰之草名曰鈎吻不可食食入口立死人信鈎吻之殺人不信黃精之益壽不亦甚乎

圖經黃精舊不載所出州土但云生山谷今南北皆有之以嵩山茅山者爲佳三月生苗高一二尺以來葉如竹葉而短兩兩相對莖梗柔脆頗似桃枝本黃末赤四月開細青白花如小豆花狀子白如黍亦有無子者根如嫩生薑黃色二月採根蒸過暴乾用今通八月採山中人丸蒸丸暴作果賣甚甘美而黃黑

色初生苗時人多採爲菜茹謂之筆菜味極美隋羊公服黃精法云黃精是芝草之精也一名萎蕤一名仙人餘糧一名苟格一名菟竹一名垂珠一名馬箭一名白及二月三月採根入地八九寸爲上細切一石以水二石五斗煮去苦味漉出囊中壓取汁澄清再煎如膏乃止以炒黑黃豆末相和令得所捏作餅子如錢許大初服二枚日益之百日止亦焙乾篩末水服功與上等世傳華佗漆葉青黏散云青黏是黃精之正葉者書傳不載未知的否

稽神錄臨川有土人虐所使婢婢乃逃入山中久之見野草枝

葉可愛卽拔取根食之甚美自是常食此而遂不飢輕健夜息
大樹下聞草中動以爲虎懼而上樹避之及曉下平地其身歛
然凌空而去或至一峯之頂若飛鳥焉數歲其家人採薪見之
告其主使捕之不得一日遇絕壁下以網三面圍之俄而騰上
山頂其主異之或曰此婢安有仙骨不過靈藥服食遂以酒饌
五味香美置往來之路觀其食否果來食食訖遂不能遠去擒
之具述其故指所食之草卽黃精也

救荒本草黃精苗俗名筆管菜採嫩葉燂熟換水浸去苦味淘
淨油鹽調食山中人採根九蒸九暴食甚甘美其蒸暴用兔去

本草綱目卷之六
底安釜上裝滿黃精密蓋蒸之令氣溜卽暴之如此九蒸九暴令極熟不熟則刺人喉咽

四時類要曰黃精二月擇取葉相對生者是眞黃精擘長二寸許稀種之一年後甚稠種子亦得其葉甚美入菜用其根堪爲煎朮與黃精仙家所重

按廣西志黃精俗名野仙薑辰谿志俗呼陽雀蕪衡山製賣者多以山薑僞爲之

福地記武當縣石階山西北角有大松樹樹下生草名救窮日食三寸絕穀不飢久之度世陶先生謂之西岳佐命是也

梧潯雜佩顧况紀秦時建阿房宮采木者偶食黃精天蒜不覺
竦身飛上就山下人家栽詩云酒盡君莫酌壺傾我當發地市
多囂塵還山弄明月今平樂志所載榮山木客事蓋附會此說
余昔在昭州嘗詢之陶偉西明府云少時聞父老云曾有人見
之今久不聞矣

峩眉山志黃精峩山產者甚佳宿進遊峩詩云拾得黃精須爛
煮飯儂明日上峩眉

海豐縣志明嘉靖中海豐有漁子數人駕舟入海爲颶風所漂
泊一絕島見其人椎結袒裼網木葉爲裳面目黧黑肌膚如枯

睢睢盱盱見漁于相顧驚笑語不可解稍前逼之輒走不敢近其居率如蘧蘆而無爨釜其傍徃徃有池池中以蜜浸食物大抵黃精薯蕷之屬漁子饑甚取食之其人亦不嗔但遠立而笑已而颶風大至飄返故岸云

薺芩

爾雅芩葳芩註薺芩

別錄薺芩味甘寒主解百藥毒陶隱居云根莖似人參而葉小異根味甜絕能殺毒以其與毒藥共處而毒藥皆自然歇不正入方家用也

圖經薺芩舊不載所出州土今川蜀江浙皆有之春生根莖都似人參而葉小異根似桔梗根但無心爲異潤州尤多人家收以爲果菜或作脯噉味甚甘美二月八月採根暴乾古方解五石毒多生服薺芩汁良又小品方療蠱取薺芩根搗末以飲服

方寸七立差

朝野僉載野豬中毒藥箭多食此物出

本草衍義薺芫今陝州採爲脯別有法甚甘美兼可寄遠古人以謂薺芫似人參者是此解藥毒甚驗

救荒本草杏葉沙參一名白麩根生密縣山野中苗高一二尺莖色青白葉似杏葉而小邊有叉牙又似山小茱葉微尖而背白梢間開五瓣白碗子花根形如野胡蘿蔔頗肥皮色灰黯中間白色味甜性微寒本草有沙參苗葉根莖其說與此形狀皆不同採苗葉燉熟水浸淘淨油鹽調食掘根換水煮食亦佳

本草綱目李時珍曰薺苳苗似桔梗根似沙參故姦裔往往以沙參薺苳通亂人參蘇頌圖經所謂杏參救荒本草所謂杏葉沙參皆此薺苳也又陶宏景註桔梗言其葉名隱忍可煮食之治蠱毒謹按爾雅云勞隱忍也郭璞註云似蘇有毛江東人藏以爲菹亦可瀹食葛洪肘後方云隱忍草苗似桔梗人皆食之烏汁飲治蠱毒據此則隱忍非桔梗乃薺苳苗也薺苳苗甘可食桔梗苗苦不可食尤爲可證神農本草經無薺苳止有桔梗一名薺苳至別錄始出薺苳蓋薺苳桔梗乃一類有甜苦二種則其苗亦可呼爲隱忍也

白前

別錄白前味甘微溫無毒主胸脇逆氣欬嗽上氣陶隱居云此藥出近道似細辛而大色白易折主氣嗽方多用之

唐本草註云此藥葉似柳或似芫花苗高尺許生洲渚沙磧之上根白長於細辛味甘俗以酒漬服主上氣不生近道俗名石藍又名嗽藥今用蔓生者味苦非真也別本注云二月八月採根陰乾根似牛膝白薇

圖經白前舊不載所出州土陶隱居云出近道今蜀中及淮浙州郡皆有之苗似細辛而大色白易折亦有葉似柳或似芫花

苗者並高尺許生洲渚沙磧之上根白長於細辛亦似牛膝白
薇輩今用蔓生者味苦非真也二月八月採根暴乾深師療久
欬逆上氣體腫短氣脹滿晝夜倚壁不得臥常作水雞聲者白
前湯主之白前二兩紫苑半夏洗各三兩大戟七合切四物以
水一斗漬一宿明日煮取三升分三服禁食羊肉錫大佳
本草衍義白前保定肺氣治嗽多用白而長於細辛但麓而脆
不似細辛之柔以溫藥相佐使則尤佳餘如經

前胡

別錄味苦微寒無毒主療痰滿胸脅中痞心腹結氣風頭痛去痰實下氣治傷寒寒熱推陳致新明目益精二月八月採根暴乾陶隱居云前胡似芫胡而柔軟爲療治欲同而本經上品有芫胡而無此晚來醫乃用之亦有畏惡明畏惡非盡然本經也此近道皆有生下濕地出吳興者爲勝

圖經前胡舊不著所出州土今陝西梁漢江淮荆襄州郡及相州孟州皆有之春生苗青白色似斜蒿初出時有白芽長三四寸味甚香美又似芸蒿七月開白花與慈花相類八月結實根

細青紫色二月八月採暴乾今鄜延將來者大與柴胡相似但柴胡赤色而脆前胡黃而柔軟不同耳一說今諸方所用前胡皆不同京師北地者色黃白枯脆絕無氣味江東乃有三四種一種類當歸而其皮斑黑肌黃而脂潤氣味濃烈一種色理黃白似人參而細短香味都微又有如草烏頭膚赤而堅有兩三歧爲一本者食之亦戟人咽喉中破以薑汁漬搗服之甚下隔解痰實然皆非前胡也今最上者出吳中又壽春生者皆類柴胡而大氣芳烈味亦濃苦療痰下氣最要都勝諸道者救荒本草前胡今密縣梁家衝山野中有之苗高一二尺青白

色似斜蒿味甚香美葉似野菊葉而瘦細頗似山蘿蔔葉亦細
又似芸蒿開豔白花類蛇床子花秋間結實根細青紫色一云
外黑裡白採葉燂熟換水浸淘淨油鹽調食

杜蘅

山海經云天帝山有草狀如葵其臭如薜蘿名曰杜蘅可以走馬食之已瘦郭璞註云帶之令人便馬或曰馬得之而健走爾雅杜土鹵註杜蘅也似葵而香

別錄杜蘅味辛溫無毒主風寒欬逆香人衣體生山谷三月三日採根熟洗暴乾陶隱居云根葉都似細辛惟氣小異爾處處有之方藥少用惟道家服之令人身衣香山海經云可療瘰

圖經杜蘅舊不著所出州土今江淮間皆有之苗葉都似細辛惟香氣小異而根亦蘆黃白色葉似馬蹄故云馬蹄香三月三

日採根熟洗暴乾

本草綱目李時珍曰按土宿本草云杜細辛葉圓如馬蹄紫背者良江南荆湖川陝閩廣俱有之取自然汁可伏硫砒制汞

大戴禮記蓬生麻中不扶自直蘭氏之根槐氏之苞漸之滫夫君子不近庶人不服質非不美也所漸者然也注蘭槐香草名槐又作懷本草云懷卽杜蘅也又名蘅薇香

爾雅翼西山經曰天帝之山有杜蘅可以走馬食之已瘿註帶之令人便馬山海經雖載異物其實皆世所有今杜蘅生山之陰水澤下濕地根葉都似細辛惟氣小異俗以其似馬蹄名曰

馬蹄香能香人衣體道家服之九歌山鬼章曰被石蘭兮帶杜衡杜衡之帶亦以其便馬不特香人衣體而已又其名謂之衡古者天子大路側載翠芷所以養鼻明車上亦有香草此草既便於馬或當亦載之衡歟又杜若亦有杜衡之名草木所以難言者以其名實相亂每每如此杜衡或只名杜釋草一名土鹵又謂之杜衡葵今俗以及已代之及已獨莖莖端四葉開白花有毒而無芳氣

廣雅疏證楚蘅杜蘅也爾雅杜土鹵郭注云杜衡也似葵而香衡與蘅同楚詞離騷云畦留夷與揭車兮雜杜衡與芳芷王注

云杜衡芳芷皆香草也西山經云天帝之山有草焉其狀如葵其臭如薜蘿名曰杜衡可以走馬食之已瘿名醫別錄云杜蘅香人衣體陶注云梶葉都似細辛惟氣小異爾唐本注云葉似槐形如馬蹄故俗云馬蹄香史記司馬相如傳索隱引博物志云杜衡一名土杏其梶一似細辛葉似葵案杜衡與土杏古同聲杜衡之杜爲土猶毛詩自土沮漆齊詩作杜也衡從行聲而通作杏猶詩荇菜字從行聲而爾雅說文作荇也又神農本草別有杜若一名杜蘅陶注謂梶似高良薑與此同名而異實廣韻云杜蘅香草大者曰杜若司馬相如子虛賦亦以衡蘭芷若

並言則杜若之外別有名杜蘅者所謂楚蘅是也御覽引范子
計然云楚蘅出楚國又引云杜若出南郡漢中大者善明楚蘅
不與杜若同物也蘇頌本草圖經謂杜若卽廣雅楚蘅非是

及已

別錄及已味苦平有毒主諸惡瘡疥痂癩蝕及牛馬諸瘡陶隱居云今人多用以合瘡疥膏甚效

唐本草註此草一莖莖頭四葉葉隙著白花好生山谷陰虛軟地根似細辛而黑有毒入口使人吐血今以當杜衡非也疥癩必須用之

日華子主頭瘡白禿風瘙皮膚蟲痒可煎汁浸并傅

鬼督郵

唐本草鬼督郵味辛苦平無毒主鬼疰卒忤中惡心腹邪氣百
精毒溫瘧疫疾強腰脚益腎力一名獨搖草註苗惟一莖葉生
莖端若繖根如牛膝而細黑所在有之有必叢生今人以徐長
卿代之非也

蜀本草圖經云莖似細箭籜高二尺以下葉生莖端狀繖蓋根
橫而不生鬚花生葉心黃白色二月八月採根所在皆有

本草綱目李時珍曰鬼督郵與及已同類根苗皆相似但以根
如細辛而色黑者爲及已根如細辛而色黃白者爲鬼督郵

延胡索

嘉祐本草延胡索味辛溫無毒主破血產後諸病因血所爲者
婦人月經不調腹中結塊崩中淋露產後血暈暴血衝上因損
下血或酒摩及煮服生奚國根如半夏色黃

海藥本草云生奚國從安東道來味甘無毒主腎氣破產後
惡露及兒枕與三棱鼈甲大黃爲散能散氣通經絡蛙蚱成末
者使之惟良偏主產後病也

本草綱目李時珍曰奚乃東北夷也今二茅山西上龍洞種之
每年寒露後栽立春後生苗葉如竹葉樣三月長三寸高根叢

生如芋卵樣立夏掘起

仙茅

嘉祐本草仙茅味辛溫有毒主心腹冷氣不能食腰腳風冷痺痺不能行丈夫虛勞老人失溺無子益陽道人服通神強記助筋骨益肌膚長精神明目一名獨茅根一名茅瓜子一名婆羅門參仙茅傳云十斤乳石不及一斤仙茅表其功力爾生西域及大庾嶺亦云忌鐵及牛乳二月八月採根

圖經曰仙茅生西域及大庾嶺今蜀川江湖兩浙諸州亦有之葉青如茅而軟復稍潤面有縱理又似櫻欄至冬盡枯春初乃生三月有花如梔子黃不結實其根獨莖而直傍有短細根相

附肉黃白外皮稍麤褐色二月八月採根暴乾用衡山出者花
碧五月結黑子謹按續傳信方叙仙茅云主五勞七傷明目益
筋力宜而復補本西域道人所傳開元元年婆羅門僧進此藥
明皇服之有效當時禁方不傳天寶之亂方書流散上都不空
三藏始得此方傳與李勉司徒路嗣恭尚書齊杭給事張建封
僕射服之皆得力路公久服金石無效及得此藥其益百倍齊
給事守縉雲日少氣力風癭繼作服之遂愈八九月時採得竹
刀子刮去黑皮切如豆粒米泔浸兩宿陰乾搗篩熟蜜丸如梧
子每日空肚酒飲任便下二十九禁食生乳及黑牛肉大減藥

力也續傳信方僞唐筠州刺史王顏所著皆因國書編錄其方
當時盛行故今江南但呼此藥爲婆羅門參

嶺南雜記仙茅出庾嶺嫦娥嶂葉似蘭根如菱鞋色白八月採
人傳葛仙翁煉丹於此上升棄餘藥遂生此丸製服之溫補元
氣唐明皇時婆羅門僧進此方服之有驗古云十斤乳石不敵
一斤仙茅今服者甚少偶有服者不甚驗豈物有今昔之異耶
本草綱目李時珍曰蘇頌所說詳盡得之但四月五月中抽莖
四五寸開小花深黃色六出不似卮子處處大山中有之人惟
取梅嶺者用而會典成都歲貢仙茅二十一斤

南越筆記仙茅產大庾嶺自嶺之巔折而東稍下爲嫦娥嶂相傳葛雅川棄其丹生仙茅葉似蘭蕙花六出其根獨莖而直旁有短細根相附八月採之濯以嶂下流泉色白如玉以酒蒸曬嘗服補益真氣土人多以餉客羅浮仙茅高僅一二寸八月生黃花根如指大長寸許外有白茅生山谷中狀如排草以作浴湯合諸香甚良又有香茅名辣草皆瑤草之族

范成大詩序玉虛觀去宜春二十五里許君上昇時飛白茅數葉以賜王長史王以宅爲觀觀旁至今有仙茅極異常草備五味尤辛辣云久食可仙道士煮湯以設客

通脫木

爾雅離南活菴註草生江南高丈許大葉莖中有瓢正白零陵人祖曰貫之爲樹疏離南草也一名活菴山海經又名寇脫生江南高丈許大葉而肥莖中有瓢正白者是也云零陵人祖曰貫之爲樹者祖且也貫事也言零陵郡人且日事之使科大若樹然也郭又註山海經云零桂人植而日灌之以爲樹然所未詳

本草拾遺通脫木無毒花上粉主諸蟲瘡野雞病取粉內瘡中生山側葉似蓖麻心中有瓢輕白可愛女工取以飾物爾雅云

離南活脫也一本云藥草生江南主蟲病今俗亦名通草

湖南通志澧州安福出通草製爲箋可以作扇

按通脫木湖南山中多有之葉大於荷似蓖麻而又岐齊如
刀切最易繁衍俗云滴露卽生李時珍以爲蔓生殊所未喻
此似木而草冬深落葉不逾時卽蓬蓬生矣速成易植草木
中甚見

酉陽雜俎通脫木如蓖麻生山側花上粉主治惡瘡心空中有
瓢輕白可愛女工取以飾物

爾雅翼離南活菴今通脫木也山海經名寇脫生山側高丈許

葉如蓖麻花上有粉莖中有瓢輕白可愛女工取以飾物按此物爲飾不知起自何世漢王符潛夫論固已譏花采之費至梁宗慄記荆楚之俗四月八日有染絹爲芙蓉捻蠟爲菱藕亦未有用此物者今通行於世矣亦用蜜藏食之今俗謂之通草按通草作藤蔓大如指其莖幹大者徑三寸每節有二三枝枝頭出五葉夏秋開紫花或白花結實如小木瓜核白瓢黑食之甘美南人謂之燕覆亦云烏覆非此類也

山慈菘

本草拾遺山慈菘根有小毒主癰腫瘡癩癰結核等醋摩傅之亦剝人面皮除疔黯生山中濕地一名金燈花葉似車前根如慈菘零陵間又有團慈菘根似小蒜所主與此略同

經驗方帖瘡腫以山慈姑一名鹿蹄草取莖葉搗爲膏入蜜帖瘡口上候清血出效

本草綱目李時珍曰山慈姑處處有之冬月生葉如水仙花之葉而狹二月中枯一莖如箭幹高尺許莖端開花白色亦有紅色黃色者上有黑點其花乃衆花簇成一朵如絲紐成可愛三

月結子有三稜四月初苗枯卽掘取其根狀如慈姑及小蒜遲則苗腐難尋矣根苗與老鴉蒜極相類但老鴉根無毛慈姑有毛殼包裹爲異爾用之去毛殼

酉陽雜俎金燈一曰九形花葉不相見俗惡人家種之一名無義草

王方慶園林草木疏金燈隰生花開纍纍明豔垂條不自支俗惡人家種之

閩書金燈莖直上末分數枝枝一花光艷如燈閩中呼爲天蒜又呼爲花葉不相見

洛陽花木記草花有紅金燈黃金燈白金燈粉紅金燈碧金燈
紫金燈